



金文最




和16  
372  
2





利  
295  
2



金文最卷四目錄

詔令 附張邦昌劉豫偽詔

招宋吳曦詔 泰和六年

遣諭布薩揆詔 泰和六年

命完顏匡攻宋襄陽詔 泰和六年

命徒單鎰節制陝西元帥府詔 泰和六年

諭完顏承裕詔 泰和六年

賜張行簡御札 泰和七年

責布薩端薦妖婦阿魯不祈雨詔 泰和七年

以衛王子按陳為鄭王永蹈後賜衛王詔 泰和七年

命按陳為鄭王後詔 泰和七年

許宋平報完顏匡詔 泰和七年

諭陝西軍士詔 泰和七年

戒諭尙書省詔 泰和八年

所錄  
有吻



章宗遺詔

泰和八年

章宗承御范氏胎氣損失詔

大安元年

賜章宗元妃李氏承御賈氏自盡詔

大安元年

允高麗元孝王權守軍國詔

崇慶元年

冊命高麗元孝王詔

崇慶元年

諭愛王詔

天定元年

立守忠為皇太子詔

貞祐元年

放還章宗元妃李氏家族詔

貞祐元年

議南遷詔

貞祐二年

罪己詔

貞祐二年

諭鄂屯襄布希萬努富察烏錦協力詔

貞祐二年

諭中都官吏軍民詔

貞祐三年

獎諭河東南路宣撫使胥鼎詔

貞祐三年

報完顏仲元請詣闕詔

貞祐四年  
以上原列卷七

賜滄海公王福等詔

興定四年

誅布薩阿海詔

興定五年

諭陝西東西兩路行省詔

宣宗時

見文雅

哀宗即位大赦詔

哀宗元光二年

戒諭百官詔

正大元年

卻貢白兔詔

正大元年

擬立東宮詔

正大元年奉都堂鈔旨作

諭止胥鼎請老詔

正大三年

遣完顏阿虎帶使宋借糧詔

天興二年

答胡士以奴降乞解軍職詔

天興二年

曲赦蔡州詔

天興二年

張邦昌僭位偽手書

張邦昌赦京城偽手書

張邦昌偽赦手書



劉豫僭位肆赦偽詔

劉豫求言偽詔

劉豫改元阜昌偽詔

劉豫遷都汴京偽詔

劉豫寇宋偽詔

劉豫獎諭羅誘偽詔

劉豫戒守令勸農偽詔

劉豫除李成鎮海軍節度使偽詔

以上原列卷八

金文最卷四

昭文張金吾月霄輯

詔令

附張邦昌劉豫偽詔

招宋吳曦詔 泰和六年

宋自信桓失守構竄江表僭稱位號偷生吳會時則乃祖武安公  
 玠捍禦兩川洎武順王璘嗣有大勳固宜世胄大帥遂荒西土長  
 為藩輔誓以河山後裔縱有藥廡之汰猶當十世宥之然威略震  
 主者身危功蓋天下者不賞自古如此非止於今卿家專制蜀漢  
 積有歲年猜嫌既萌進退維谷代之而不受召之而不赴君臣之  
 義已同路人譬之破桐之葉不可以復合騎虎之勢不可以中下  
 矣此事流傳稔于朕聽每一思之未嘗不當饋歎息而卿猶偃然  
 自安且卿自視翼贊之功孰與岳飛飛之威名戰功暴於南北一  
 旦見忌遂被參夷之誅可不畏哉故智者順時而動明者因機而  
 發與其負高世之勳見疑於人惴惴然常懼不得保其首領曷若



順時因機轉禍爲福建萬世不朽之業哉今趙擴昏辱受制強臣  
比年以來頓違誓約增屯軍馬招納叛亡朕以生靈之故未欲遽  
行討伐姑遣有司移文復因來使宣諭而乃不顧道理愈肆憑陵  
虔劉我邊陲攻剽我城邑是以忠臣扼腕義士痛心家與爲讎人  
百其勇失道至此雖欲不亡得乎朕已分命虎臣臨江問罪長驅  
並驚飛渡有期此正豪傑分功之秋也卿以英偉之姿處危疑之  
地必能深識天命洞見事機若按兵閉境不爲異同使我師并力  
巢穴而無西顧之虞則全蜀之地卿所素有當加封冊一依皇統  
冊構故事更能順流東下助爲犄角則旌麾所指盡以相付天日  
在上朕不食言今送金寶一鈕至可領也

金史

遣諭布薩揆詔

泰和六年

前得卿奏先鋒已奪頰口偏師又下安豐斬馘之數各以萬計近  
又西師告捷棗陽光化旣爲我有樊城鄧城亦自潰散又聞隨州  
闔城歸順山東之眾久圍楚州隴右之師刻期出界卿提大兵攻

合肥趙擴聞之料已破膽失其神守度彼之計乞和爲上昔嘗畫  
三事付卿以今事勢計之徑渡長江亦其時矣淮南旣爲我有際  
江爲界理所宜然如使趙擴奉表稱臣歲增貢幣縛送賊魁還所  
俘掠一如所諭亦可罷兵卿宜廣爲渡江之勢使彼有必死之憂  
從其所請而縱之僅得餘息偷生豈敢復萌他慮卿於此時經營  
江北勞俸安集除其虐政橫賦以良吏撫字疲民以精兵分守要  
害雖未係趙擴之頸而朕前所畫三事上功已成矣前人見時已  
嘗議定今復諄諄者欲決卿成功爾機會難遇卿其勉之

金史

命完顏匡攻宋襄陽詔

泰和六年

陝西一面雖下四州吳曦之降朕所經略自大軍出境惟卿所部  
力戰爲多方之前人無所愧謝今南伐之事責成卿等區區俘獲  
不足羨慕果能爲國建功豈止一身榮寵後世子孫亦保富貴

金史

命徒單鑑節制陝西元帥府詔

泰和六年



將帥雖武悍久歷行陣而宋人狡獪亦資算勝卿之智略朕所深  
悉且股肱舊臣故有此寄宜以長策禦敵厲兵撫民稱朕意焉

金史

諭完顏承裕詔

泰和七年

昔乃祖乃父戮力戎旅汝年尚少善於其職故命汝與完顏璘同  
行出界汝自言得兵三萬足以辦事今以石秣仲温朮虎高琪及  
青宜可與汝軍相合計可六萬斯亦足以辦矣仲温高琪兵道險  
阻汝兵道甚易也自秦州至仙人關纔四百里耳從長計畫以副  
朕意

金史

賜張行簡御札

泰和六年

朕念鎬鄭二王誤于天常自貽伊戚藁葬郊野多歷年所朕甚悼  
焉欲追復前爵備禮改葬卿可詳閱唐貞觀追贈隱巢并前代故  
事密封以聞又欲使石古乃於威州擇地營葬歲時祭奠兼命衛  
王諸子中立一人為鄭王後謹其祭祀此事既行理須降詔卿草

詔文大意一就封進

金史

責布薩端薦妖婦阿魯不祈雨詔

泰和七年

昔者所奏今其若何後人謂朕信其妖妄實由卿啟其端倪鬱于  
子懷念之難置其循省于往咎思善補于將來恪整乃心式副朕  
意

金史

以衛王子按陳為鄭王永蹈後賜衛王詔

泰和七年

朕念鄭王自棄天常以于國憲藁瘞曠野忽諸不祀歷歲既久深  
用愴然親親之情有懷難置已詔追復舊爵改葬如儀稽考古禮  
以卿之子按陳為鄭王後謹其祭祀卿其悉之

金史

命按陳為鄭王後詔

泰和七年

朕追維鄭邸誤蹈匪彝藁窆原野多歷歲年怛然軫懷有不能已  
乃詔追復王爵備禮改葬今稽式古典命汝為鄭王後守其祭祀

金史

許宋平報完顏匡詔

泰和七年



朕以生靈之故已從請稱臣割地尙且闢略區區小節何足深較其侂胄師旦首函及諸叛亡至濠州卽聽通謝人使入界軍馬卽當撤還川陝關隘候歲幣犒軍銀兩至下蔡劃日割賜

諭陝西軍士詔泰和七年

汝等爰自去冬出疆用命擐披甲冑冒涉艱險直取山外數州比之他軍實有勤效界外屯駐日久負勞苦恩賞未行有司申奏不明以致如此朕已令增給賞物以酬爾勞惟是餘賊未殄猶須經略眷我師徒久役未解深懷憫念寤寐弗忘汝等益思體國之忠奮敵愾之勇協心畢力建立功勳高爵厚祿朕所不吝

戒諭尙書省詔泰和八年

國家之治在于紀綱紀綱所先賞罰必信今迺上自省部之重下逮司縣之閒律度弗循私懷自便遷延曠歲苟且成風習此爲恆從何致理朝廷者百官之本京師者諸夏之儀其昂自今各懲已往遵繩奉法竭力赴功無枉撓以徇情無依違而避勢壹歸于正

用範乃民

金史 章宗遺詔泰和八年

皇叔衛王承世宗之遺體鍾厚慶於元妃人望所歸歷數斯在今朕上體太祖皇帝傳授至公之意付畀寶祚卽皇帝位於樞前載惟禮經有嫡立嫡無嫡立庶今朕之內人見有娠者兩位已詔皇弟如其中有男當立爲儲貳如皆是男子擇可立者立之

章宗承御范氏胎氣損失詔大安元年

章宗皇帝以天下重器畀于眇躬遺旨謂掖庭內人有娠者兩位如得男則立爲儲貳申諭多方皎如天日朕雖涼菲實受付託思克副于遺意每曲爲之盡心擇靜舍以俾居遣懿親而守視欽懷皇后母鄭國公主及乳母蕭國夫人晝夜不離昨聞有爽于安養已用軫憂而弗甯爰命大臣專爲調護今者平章政事僕散端左丞孫卽康奏言承御賈氏當以十一月免乳今則已出三月來事未可度知范氏產期合在正月而太醫副使儀師顏言自年前十



一月診得范氏胎氣有損調治迄今脉息雖和胎形已失及范氏自願於神御前削髮爲尼重念先皇帝重屬大事豈期聞此深用怛然今范氏既有損而賈氏猶或可冀告於先帝願降靈禧默賜保全早生聖嗣尙恐眾庶未究端由要不匿於播敷使咸明於吾意

金史

賜章宗元妃李氏承御賈氏自盡詔 大安元年

近者有訴元妃李氏潛計負恩自泰和七年正月章宗暫嘗違豫李氏與新喜竊議爲儲嗣未立欲令宮人詐作有身計取他兒詐充皇嗣遂於年前閏月十日因賈承御病嘔唾腹中若有積塊李氏與其母王盼兒及李新喜謀令賈氏詐稱有身俟將臨月於李家取兒以入月日不偶則規別取以爲皇嗣章宗崩謀不及行當先帝彌留之際命平章政事完顏匡都提點中外事務明有敕旨我有兩宮人有娠更令召平章左右並聞斯語李氏并新喜乃敢不依敕旨欲喚喜兒鐵哥事既不克竊呼提點近侍局烏古論慶

壽與計因品藻諸王議復不定知近侍局副使徒單張僧遣人召平章已到宣華門外始發勦同平章入內一遵遺旨以定大事方先帝疾危數召李氏李氏不到及索衣服李氏承召亦不卽來猶與其母私議先皇平昔或有幸御李氏嫉妬令女巫李定奴作紙木人鴛鴦符以事魘魅致絕聖嗣所爲不軌莫可殫陳氏既發露遣大臣按問俱已款服命宰臣往審亦如之有司議法當極刑以其久侍先帝欲免其死王公百僚執奏堅確令賜李氏自盡王盼兒李新喜各正典刑李氏兄安國軍節度使喜兒弟少府監鐵哥如律仍追除復係監籍於遠地安置諸連坐並依律令施行承御賈氏亦賜自盡

金史

允高麗元孝王權守軍國詔 崇慶元年

朕惟爾國世爲忠勤意前王遽以病讓謂爾乃仲父之子而素有象賢之稱徵遺訓於先臣俾攝行於機務已頒答詔特示矜從茲查閱於來章宜明諭於朕指其承恩許益謹藩儀續當遣使冊命



冊命高麗元孝王詔 崇慶元年

邇者前王乃以國讓謂卿賢淑祈受世封肆臨遣於使軺俾就加於錫命益思忠恪茂對寵光今差正使明虎大將軍大理寺完顏惟基副使翰林直學士大中大夫張翰往彼冊命仍賜卿車服金印匹段弓箭鞍馬等物具如別錄 高麗史

諭愛王詔 天定元年

泰和猜忌兄弟失歡骨肉至親化為讎怨誘引外敵傾危本國計王之心亦復何忍往事已矣今宜改圖朕遭家多難靖晦以處忽諸父諸臣橫見推逼義不容辭王是朕之姪朕是王之叔叔姪天性甯不坦然今自和龍東北永為王國保有北朔子孫嗣守勿信閒言憑陵以逞叔姪二人同形共氣設或交兵務行兼井太祖太宗在天之靈亦不錫佑昔梁營與湘東為叔姪之仇營誘周兵以陷江陵隨亦失國而為人僂此事宜鑒三復予言 大金國志參南

遷錄

立守忠為皇太子詔 貞祐元年

朕以眇躬嗣服景命念祖宗之遺統方夙夜以靡遑將上以承九廟之靈而下以繫多方之望皇太子守忠性秉溫良地居長嫡以次第言之則宜升儲貳以典禮質之則足愜羣情其立為皇太子 金史

放還章宗元妃李氏家族詔 貞祐元年

大安之初頒諭天下謂李氏與其母王盼兒及李新喜同謀令賈氏虛稱有身各正罪法朕惟章宗皇帝聖德聰明豈容有此欺給近因集議武衛軍副使兼提點近侍局完顏達霍王傳大政德皆言賈氏事內有冤此時達職在近侍政德護賈氏所以知之朕親臨問左證其事曖昧據當時被罪貶責者可俱令放免還家 金史

議南遷詔 貞祐二年

國有大事謀貴僉同我太祖效文王之興岐居龍朔以有天下忠



獻繼周公之卜洛宅中京以朝諸侯頃歲多虞兵端未已臣鄰思  
久遠之圖國人懷固本之思盍各進言以圖長策 大金國志

罪已詔 貞祐二年

一人无良萬方何罪興言及此流涕奚從朕方圖大以宅中期與  
更新而沐化劉伯林李斌楊安兒王燕張耀等或嘗經任使或曾  
經征行偶此失圖遂迷故道朕念先皇之興起尙合南北於一家  
胡爲今日之紛張遂化仇讎于同軌倘使翻然順命必將加以厚  
恩朕不倉言爾當敬聽 大金國志

諭鄂屯襄布希萬努富察烏錦協力詔 貞祐二年

上京遼東國家重地以卿等累效忠勤故委腹心意其協力盡公  
以徇國家之急及詳來奏乃大不然朕將何賴自今每事同心并  
力備禦機會一失悔之何及且師克在和善鈞從政尙懲前過以  
圖後功 金史

諭中都官吏軍民詔 貞祐三年

朕欲紓民力遂幸陪都天未悔禍時尙多虞道路久梗音問難通  
汝等朝暮矢石暴露風霜思惟報國靡有二心俟兵事之稍息當  
不愆於旌賞今已會合諸路兵馬救援故茲獎諭想宜知悉 金史

獎諭河東南路宣撫使胥鼎詔 貞祐三年

卿以文武之才膺兵民之寄往鎮方面式固邊防坐釋朕憂孰如  
卿力益懋忠勤之節以收綏靖之功仰副予心嗣有後寵 金史

報完顏仲元請詣闕詔 貞祐四年

卿兄弟鳩集義旅所在立功忠義之誠皎然可見朕以參政侯摯  
與卿素厚命于彼中行省應悉朕心卿求入見其意固嘉東平方  
危正賴卿等相爲聲援俟兵勢稍綏卽徙軍附河屯駐此時卿來  
蓋未晚也尙思戮力朕不汝忘 金史

賜滄海公王福等詔 貞祐四年

乃者邊防不守河朔失甯卿等自摠戎昭備殫忠力若能自效朕  
復何憂宜膺茅土之封復賜忠臣之號除已畫定所管州縣外如



能收復鄰近州縣者亦聽管屬金史

誅布薩阿海詔興定五年

銀青榮祿大夫左副元帥兼樞密副使駙馬都尉僕散阿海早藉世姻寢馳仕規屬當軍旅之事益厚朝廷之恩爰自帥藩擢居樞府頃者南伐時乃奏言是俾行鱗介之誅而盡露梟獍之狀二城雖得多罪稔彰念勝負之靡常肯刑章之輕用始自畫囚糧之計乃更嚴橫斂之期督促計司彫弊民力信其私意或失防秋顧利害之實深尙優容而弗問頃因近侍悉露姦謀蓋虞前後罪之上聞迺以金玉帶而夜獻審事情之詭秘命信臣而鞫推迨致款詞乃詳實狀自以積愆之著必非公憲所容欲結近臣之歡心俾伺內庭之指意如鸞端之少露得先事而易圖因其方握兵權得以謀危廟社事或不濟計即外奔前日之俘隨時誅戮獨於宋族曲活全門示其悖德於敵雖豫計全身而納用金史

哀宗即位大赦詔哀宗元光二年

朕述先帝之遺意有便於時欲行而未及者悉奉而行之國家已有定制有司往往以情破法使人罔遭刑憲今後有本條而不遵者以故入人罪罪之草澤士庶許令直言軍國利害雖涉譏諷無可采取者並不坐罪金史

戒諭百官詔正大元年

朕新卽大位肇親萬機國是實爲未明政統猶懼多闕尙賴爾文武多士內外庶僚上下同心始終戮力以副遺大投艱之託共成興滯補廢之功然而養資考者每務於因循嗜閑逸者或託於疾病因之積弊習以成風事至於斯朕將何賴蓋嘗深維百姓勤營之意尙能不念累聖涵養之仁服田力穡而以給租庸輓粟飛芻而不憚征繕況爾等世膺高爵身受厚恩夫有國乃可以有家而爲臣亦猶之爲子未有國不安而家可保必須臣竭力而君以甯加之事屬方殷時丁多故舊疆待乎恢復強敵期于削平正當經營之秋難行姑息之政朕旣夙宵軫念庶幾宏業以昭功爾其朝



夕在公豈宜翫歲而惕日夫湯刑以儆具位周典以正百官茲出  
 讜言為明訓掌刑者有法可奉毋使有冤抑之情典選者有格可  
 修毋妄求疏駁之節錢穀當審知取予毋吝于出納之門臺諫當  
 指陳是非毋涉于細碎之事司農以敦本察吏不可苟且而曠職  
 司牧民以扶弱抑強不可聚斂而營私計至於大而分閫小而掌  
 兵固當志殄寇讎日闢土宇受朝廷之託必思報國念功臣之後  
 常恐辱先又豈可平居或冒於糗糧臨事或生於畏懼視郡縣之  
 官妄分於彼此役部伍之卒不計於公私凡有我官所當共戒其  
 敬遵於邦憲務恪慎於官箴享富貴於當年垂功名於身後且賞  
 罰期於信必而功罪貴乎正明茲誠前代之良規亦我祖宗之已  
 事今當仰法要在決行於戲任賢使能周室果聞於興復綜名核  
 實漢家遂至於肅清公勤者賞不敢私弛慢者刑茲無赦各勤爾  
 職明聽朕言故茲詔示想宜知悉

玉堂嘉話

御貢白兔詔

正大元年

得賢臣輔佐年穀豐登此上瑞也焉事此為令有司給道里費縱  
 之本土禮部其徧諭四方使知朕意

金史

擬立東宮詔

正大元年奉都堂鈞旨作

惟王建国篤為長世之謀惟國立儲茂正萬邦之本位號定而莫  
 不以為悅典禮崇而莫敢以為私眷予上嗣之良優有中興之略  
 內則視膳問安之禮備外則尊道讓齒之義隆藹然仁孝之稱粹  
 矣溫文之表朕自紹休於大統猶虛位于東朝乃考著龜之占乃  
 稽方冊之寶夏后與子天之望攸歸周家尚親廟社之尊斯在  
 載涓穀旦爰闢青宮下以副四海之心上以對兩宮之訓某可立  
 為皇太子於戲文昭武穆夙貽燕翼之謀震長離明本有承華之  
 象尚因主鬯之重嗣啟迓衡之期

遺山集

諭止胥鼎請老詔

正大三年

卿往在河東殘破孤危殆不易保卿一至而定迄卿移鎮敵不復  
 侵何乃過為嫌避且君臣均為一體朕待下亦豈自殊自外之語



殆為過計況餘人才力孰可副卿者卿年老久勞於外朕豈不知但國家百年積累之基河朔億萬生靈之命卿當勉出壯圖同濟大事金史

遣完顏阿虎帶使宋借糧詔天興二年

宋人負朕深矣朕自即位數戒邊臣無擾邊界邊臣有自請討伐者朕未嘗不切責之向得州民隨即見付近日淮陰來歸彼欲多輸錢帛為贖朕若受財是貨之也秋毫不犯付以全城清口臨陣生獲數十人悉以資糧遣之今乘我困弊據我壽泗既誘我鄧州又攻我唐州雖然彼所以為謀亦淺矣敵人滅國四十以及於夏夏亡則及於我我亡則及於宋唇亡齒寒自然之理耳為彼之計不若與我連和同體大敵所以為我者亦為彼也卿至其以此意曉之汝南遺事參金史

答胡士以奴降乞解軍職詔天興二年

卿父子兄弟皆為帥臣榮被國恩不為不厚顧卿豈有求降理耶

卿在洛陽不即投降而千里遠來降於蔡亦豈人情也哉聞卿遇奴太察且其衣食不甚豐腆此自奴輩往求飽煖計耳卿何慊為哉汝南遺事

曲赦蔡州詔天興二年

天方悔禍少寬北顧之憂人亦告勞爰啟南巡之議惟今蔡郡實古豫州干戈以來市井如故久以孤墉而抗敵出于眾力之輸勤爰聞臨幸之初逾謹奉迎之禮人已至於垂淚朕亦為之動懷宣沛恩私曲加慰浣自天興二年七月一日味爽以前據蔡州管內支郡屬縣雜犯死罪以下並行釋免官吏軍民各覃恩兩重歸德以南經過去處曾經應辦者遷一官百姓逃亡戶絕者拋下地土聽人恣耕並免差稅自來拖欠官房地基軍需等錢俱免追徵連年兵飢多有暴露骸骨仰所在官司如法埋瘞嗚呼奉畜爾眾敢辭毫邑之遷時邁其邦尚獲周家之助咨爾有眾體予至懷故茲詔示想宜知悉大金國志參汝南遺事



張邦昌僭位偽手書

予以寡陋近迫大國之威俾救斯民於兵火而諸公橫見推逼不容自裁忍死以理國事豈其心哉顧德弗類實難稱塞出令之初有司乃以聖旨行下載循味陋殊震危衷夫聖孔子不居則子豈敢自今與三省樞密院議定處分及內外官司面陳得旨事稱面旨內降及批出文字稱中旨遣官傳諭所司稱宣旨洪惟非常之變適遭會於斯時尚冀有永之圖訖救甯於區夏庶幾多士共識此懷

北盟會編參靖康要錄

張邦昌赦京城僞手書

嗣位之初理宜廣推恩沛今四方道路未通赦宥未能宣布緣京城圍閉日久下項事可以先次施行應在京罪人所犯無輕重不論已未發覺常赦所不原者並與釋放應文臣承務郎武臣承信郎以上并內臣及致仕官並與轉官在職選人循資校尉比類施行令磨勘者仍並不隔磨勘應文武陞朝官並禁軍都虞候以上

父母妻未有官封者並與封敘已有官封者更與封敘亡沒未封贈者並與封贈已封贈者更與封贈祖父母在願回授者聽應禁軍正副指揮使以上各特與兒男下班祇應一名應承務郎以上服綠緋及十五年不以賊私罪並與改轉服色開封府國學及別試所去年秋試得解舉首特與推恩餘並以今年八月鎖院省試應合特奏名人並與免試內曾經六舉人以上到省人與補登仕郎五舉人與補京府助教四舉上州文學三舉下州文學兩舉諸州助教錫慶院試中在學不係在學生免廷試推恩人諸路解到武藝合格人等並照原降指揮分等參酌推恩應命官除名追降官員及勒停終身不齒放歸田里人等及永不收敘人並與敘元官落職人與復舊職令刑部檢舉奏聞應停降諸色人等未曾敘用者並與特敘元職名其永不收敘人依此以次遷補候有闕收補應配軍因圍閉未出京人候開門日配沙門島並配鄰州見分配在京重役處者仰刑部疾速具元犯取旨放令逐便應逃亡軍



人及潰散人兵除依累降指揮招集出首外尙慮有未及首人可  
特展一月首身其存恤等事並依已降指揮應係官司欠負不以  
名色貫伯並行蠲免其私債無利息者限一年外許理索諸軍緣  
借請之類見克請受者並特與除放耆老並賜粟帛令戶部支給  
償錢官司房錢不以貫伯並放三月出糶米麥雜豆以濟貧民雖  
已降指揮減價尙慮民間不易可令更與減價出糶仍約束逐場  
人民擁併仰戶部踏逐應有係官木植及空閑屋舍添置賣場以  
濟細民無致沮滯掩骼王政所先當草昧圍城之中不忍視其橫  
逆應亡沒貧民仰開封府量給官錢充葬送之費應細民疾病貧  
乏無藥者令開封府疾速措置差官分定坊巷就門俵散官藥諸  
軍疾病合給官藥緣多事之際給散不時仰馬軍司體度速支官  
錢廣行合藥俵散其諸軍差發到軍兵保甲等有疾病者令所轄  
官司依在京軍營法醫治應伎術人等并家屬趨赴軍前者所拋  
下財產其有分人許經開封府自陳驗實給付應寺院宮觀有隔

下發放等恩澤各令自陳所屬保明申禮部限三日給降度牒應  
特旨還俗僧道特與依舊爲僧道令開封府出給公據應禁宮觀  
寺尼女冠令所屬取問願歸俗者聽從便應見行法令典章百司  
事務職任一切並依舊內有于民不便者臺省寺監條具以聞仍  
許諸色人經鼓院奏陳當議參詳更定以從民欲

要錄參北盟會編

建炎以來繫年

### 張邦昌偽赦手書

海內承平垂二百載生民樂業豈復知兵乃者奸臣輕構邊難大  
金再舉奄及都畿城守不堅二帝遷北中原之大踰月無君子適  
以還歸橫見推逼旣自殘而弗獲乃忍死以救民言念生靈係心  
宸極道路阻音郵之達吏民無詔令之承想其憔悴之憂同此危  
亡之急倘不深求於民瘼豈能宏濟于時艱宜示撫循用舒陘阨  
庶亟臻於甯謐以終究於遠圖可依下項應手書到日昧爽以前  
罪無輕重常赦所不原者並特釋放

靖康要錄參北盟會編



金吾案北盟會編引中興遺史靖康遺錄  
載張邦昌僞赦文二俱與此異附錄于後

天下承平幾二百載百姓樂業豈復知兵奸臣首結邊難招致禍  
變城守不堅致嗣君皇帝越在郊野予以還歸橫見推逼有堯舜  
之揖讓無湯武之干戈四方之廣弗通者半年京城之大無君者  
三月從宜康濟庶拯危難應手書到日罪無輕重並與釋放

一差官省視園陵

二諸州天慶天甯依舊行香

三諸州軍守臣各令兵至近甸保守無虞義同有功起發勤王兵

仰卻於元來處分屯

中興遺史

四存恤諸處宗室餘並依前赦

宋家遭陽九之厄二帝北遷蒙塵萬里予適以使還強見推立既  
自裁而弗獲乃忍死而救民言念生靈繫心宸極道路阻郵傳之  
問遠近乖向往之誠宜敷德音用罄寰宇可大赦天下云云諸道  
勤王人兵當國家危急不能進援京師失守乃欲偷安雖無誠節

亦已勤勞宜各歸本貫別候中旨

靖康遺錄

劉豫僭位肆赦偽詔

門下自前朝失御率土無依內離民心致蠱起弄兵之盜外開邊  
隙來鷹揚問罪之師山川靡甯干戈互動耕桑廢業隴畝彌望而  
荆榛老幼逃生廬舍多為之灰燼原野厭于流血溝壑填于殘骸  
兵火連年不休亂離自古所少言之流涕念及痛心嗟赤子之無  
辜冀皇天之悔禍宣命亟班於上國郡制特設于東州顧朕何人  
誤承此任自念風猷寡陋家世側微昔也壯年久林泉之是樂今  
焉晚節豈軒冕之為心屢乞退閑竟無允命提綱五路空殫夙夜  
之勞歷試暮年蔑著錙銖之效雖近地稍形于康乂而遠民未免  
于飢荒方圖自効而歸敢有懷它之望顯冊之既申命要在必從  
避辭者凡四章無所不至使命愈加乎敦迫軍民不容於遁逃至  
於屬部之州列奏樂推之牘此豈人事致爾實有天數存焉知便  
安難遂於己私則吉凶宜同於民患當天造之草昧念王業之艱



難恭授冊儀尚循牆而欲避勉膺位號若負刺之不遑雖非虞舜之明揚幸無成湯之慙德已於天會八年九月九日即皇帝位國號大齊布告中外咸知朕意尚念世道交喪國俗益訛貪頑未變於餘風誑誤多罹於憲網力期化洽深軫哀矜宜布湛恩與之更始可大赦天下云云於戲臨深履薄何以當付畀之隆拯溺救焚何以慰來蘇之望尚賴公卿宣力士庶協心共贊眇冲以臻康泰北盟會編參偽齊錄

劉豫求言偽詔

辭避無術竟當重任蒙遠近官吏士庶耆老湊集稱慶顧無以能副眾誠勤惟極愧惕念時當草昧事極艱難臨政之初若涉大水其無津涯更冀官吏軍民耆老凡有所見直言無隱庶補昧陋其圖永濟北盟會編參偽齊錄

劉豫改元阜昌偽詔

王者受命必建元以正始近古以來仍紀嘉號以與天下更新乃

者即位之始有司請遵舊制朕以大國之故遜避未遑而使命遠臨促立別號以昭受命之元運新我齊民之耳目嘉與諸夏共承天休其以十一月二十三日建元為阜昌之元年布告天下咸使聞知北盟會編參偽齊錄

劉豫遷都汴京偽詔

汴京實四方之上游名區奧壤為天下最今所宜都無以易此而朕以遷都重事未嘗輕議既而寇盜衰息強梗還歸關輔混同人漸甯謐宅中而據會要因舊以建新都乃其時也朕志已定朝議僉協將戒嚴而順動宜先事以示期誕布詔音直敷羣聽已定明年春末遷都於汴凡爾遐邇咸知朕意北盟會編參偽齊錄

劉豫寇宋偽詔

朕膺受天命既作民主遂竭其憂勤撫治中原數年而來治頗有緒永惟吳越巴蜀江湖鎮海皆定議一統之地含齒帶髮莫非臣民閱其陷於僭逆之邦豈不欲速使混一重念大亂之餘生民困



極深加惻隱不忍用兵且冀趙構久自悔悟稍能革其不道故爲之請于大金割江表之地而封之使永保趙氏之祀大金以元議絕滅但欲終其攻伐力請逾堅方獲聽許朕所以施德于江南者顧不厚哉蓋朕以救生靈爲心勉卽大位彼倘能善保一隅不肆殘暴雖分裂土地樹之國都使海內偃兵息民朕之志也豈圖怙惡不悛蔑棄大德乃敢僞通使聘密圖吞噬先乘不備之隙攻劫汝潁後舉烏合之眾侵掠襄鄧至妄肆蜂蠆之毒有收燕雲之謀若尙加含忍則南北億兆生靈無休息安泰之期是用特遣皇太子爲諸路兵馬大總管尙書左丞相梁國公麟領東南道行臺合大金元帥大軍直搗僭壘俘其罪人布宣德音弔彼黎庶務使六合混一永無兵革之虞生民共遂有生之樂播告天下明體至懷故茲詔示想宜知悉

偽齊錄

劉豫獎諭羅誘僞詔

朕乘時創業實賴英父當宁求賢孰爲賢者皇天助順錫我忠良

卿克堅北面之心首建南征之策顧奇謀遠略灼見敵情凡吾師徒皆所毗倚賜卿絹一百疋日下乘傳赴闕以俟登庸朕當親勒六軍式圖厥事果獲戢定樂與卿共之安享太平豈不美哉秋涼比來安好遣書指不多及

北盟會編參偽齊錄

劉豫戒守令勸農僞詔

朕撫有海內五年于茲賤末而貴本欲使元元之民皆趨南畝豐衣足食水旱有儲比至于今田野未盡墾闢閭閻之閒儲蓄尙寡抑亦長民之吏訓督之未至且古者循吏或出入阡陌躬勸耕桑課民樹藝悉有程品用是戶口蕃滋獄訟漸息今郡守縣令所以助朕致理何獨不能及茲適今播種之始亦各勉盡率土之力使地無遺利農民亦宜深念再免兵火之厄泰然更生無事情游竭力田畝務遂生生之業以養父母以育妻子臻于福壽不亦善乎布告天下咸使聞知稱朕敦本務農之意毋忽朕命故茲詔示想宜知悉

北盟會編參偽齊錄



劉豫除李成鎮海軍節度使偽詔

門下授鉞建旄式重兵權之寄折衝禦侮先分闔外之憂思付戎  
麾喜獲虎將宜敷渙號顯告明廷中侍大夫安化軍承宣使鄭州  
守李成智識精明性資果毅戰遇強敵禦軍鋒弓縮二鈞矢穿  
鐵騎增摧鋒陷陣之勇立斬將擐旗之功仰察天時俯觀人事拯  
生民之塗炭提士眾以來歸允懷心膂之良增重爪牙之士嗚呼  
賈復提眾以歸漢終成定亂之功尉遲捨偽以存唐屢著擒賊之  
績擬予大將思配前人可特授鎮海軍節度使輔國上將軍充山  
東路留守東平府住坐賜馬五十疋黃金三十斤北盟會編卷八

金文最卷四

金文最卷五目錄

冊文 附劉豫偽冊文

上太祖尊諡冊文 天會三年 見文雅

增上太祖尊諡冊文 皇統五年

上太宗尊諡冊文 天會十三年 見文雅

上景宣皇帝尊諡冊文 天會十三年

上熙宗尊號冊文 皇統元年 見文雅

增上孝成皇帝尊諡冊文 大定十九年

增上睿宗尊諡冊文 大定三年

上世宗尊號冊文 大定七年 見文雅

加上世宗尊號冊文 大定十一年

宣宗遷座德陵冊文 元光二年

上聖穆皇后尊諡冊文 天會十三年

上光懿皇后尊諡冊文 天會十三年

宗 幹

絃石烈真彌

李 石

趙秉文



上欽仁皇后尊諡冊文

天會十三年

上明惠皇后尊諡冊文

正大八年  
以上原列卷九

立貴妃裴滿氏為皇后冊文

皇統元年

立皇子濟安為皇太子冊文

皇統二年

立楚王為皇太子冊文

大定八年 見文雅

立原王為皇太孫冊文

大定二十六年 見文雅

命宋康王為皇帝冊文

皇統二年

立張邦昌冊文

天會五年

立劉豫冊文

天會八年

進封劉豫曹王冊文

皇統二年

封高麗恭孝王冊文

皇統二年

封高麗光孝王冊文

大定十二年

封高麗元孝王冊文

崇慶元年

封高麗孝成王冊文

泰和五年 見文雅

封長白山神為靈應王冊文

大定十五年

封大房山神為保陵公冊文

大定二十一年

封瑪達格山神為瑞聖公冊文

明昌四年

封靜甯山神為鎮安公冊文

明昌六年

封混同江神為應聖公冊文

大定二十五年

劉豫立妻錢氏為后冊文

以上原列卷十



金文最卷五

昭文張金吾月霄輯

冊文

附劉豫偽冊文

增上太祖尊諡冊文

皇統五年

孝孫嗣皇帝臣名諱謹拜手稽首曰臣聞自昔繼體守文之君嗣  
 服重熙累洽之運念稽圖之綿邈由祖考之艱勤則必茂揚耿光  
 祇薦大號豈惟盡臣子奉先之孝亦以答神祇申命之休故文王  
 肇造周室既以文為諡而又謂之不顯考又謂之甯王武王克定  
 殷邦既以武為稱而又謂之光烈考又謂之正父載于大訓是曰  
 王彝粵自遼人不綱上帝降割占烏止于誰屋逐鹿競于中原塗  
 炭之危玉石無辨我太祖武元皇帝遵養時晦顧諟天明以德行  
 仁勢靡憑于力假奉辭伐罪攻不自于我先方秉鉞以誓師洎臨  
 津而飲馬神光赫然四燭輝甚朝暾天塹為之伏流坦如平地故  
 得讐民禡魄鄰壤歸心牧野前徒俄倒戈而自潰霍邑固守望舉



鞭而已摧自是歲冒風霜躬擐甲胄其至有如時雨其攻無復堅  
城未踰數載之間盡取五京之地北連六鎮南界九河西懾崆峒  
東漸溟渤若遠若近悉主悉臣至于圖任親賢倚如手足懷服歸  
附推以腹心有典有則以垂裕于子孫無黨無偏以示公於好惡  
惡衣服卑宮室夏禹之無閒然也不邇聲色不殖貨利成湯之又  
日新也治監太清簡易為政羲昊之淳風也德崇克讓推授靡私  
唐虞之高躅也若乃仁恩光被於有截智慮預圖于未形禮義所  
維威信所接卜世之久與天無窮臣嗣守丕圖恪繩遺矩念欲報  
之懷曷已而追崇之禮未加想如在之音容懍勿甯於朝夕率籲  
眾志參稽格言咸謂道合於天至謂之元與諡議同雖地溥天崇  
固不容于測度而涓流塵集冀少益於高深臣不勝大願謹奉玉  
冊玉寶恭上尊諡曰應乾興運昭德定功睿神莊孝仁明大聖武  
元皇帝恭惟神用無方天監在下察冲人之永慕歆兆姓之樂推  
風馬雲車俯故宮而暫憩金文玉篆揚景鑠於無窮大金集禮

上景宣皇帝尊諡冊文

天會十三年

德高聖人而無其位裕在後昆子有天下則歸所尊古隆此禮故  
周武追王於文考漢宣正位于悼皇皆所以奉亡如存飾終昭遠  
昊天欲報誠難究于生成大道無名或強加其稱謂方改園陵之  
卜宜新簡冊之輝伏惟皇考性稟乾剛望崇震嫡廓有大度鬱為  
英風安民之志出自妙齡幹國之功流于今日肇邦有夏雖由湯  
后之勃興舉事亡隋實賴秦王之早計初自義旗既建戎輅徂征  
提銳旅以偕行誓羣豪而先倡謀猷克壯騎射兼能決機事則不  
疑見大敵而愈奮長于將將萬夫之政不足觀意在賢賢一个之  
善未嘗失人惟幹蠱士勇同仇濯濯威聲遂成德畏桓桓忠節率  
自孝移遂協濟於天功俄永清于海內辰極既正七鬯宜歸文帝  
至公輒拒有司之請與夷善讓終推仲父之賢視天下以若遺曾  
胸中之不介歷古無幾非聖而何若乃朝夕問安左右致養勤而  
不懈樂且有餘宗族皆以孝稱昆弟未嘗言閒其直也正人之曲



其質也安俗之淳儼若神明莫之敢犯坦無城府亦以易從富貴  
不驕聲色不溺與人同羽旄之樂處躬無彫峻之華賢愚莫遁於  
聰明善惡必期於進退虛徐戒智者之察隱卹知小人之艱蓋惟  
道以是從誠不聞而亦式天資至德備眾美而無得稱地本元良  
在羣情之實所係何祲象之告變遽靈儀之上賓九族爲之痛心  
百姓嗟乎無祿自惟冲幼夙遭閔凶頃以眇身猥承大統雖太宗  
大義之及此實昭考餘休之至然十二載之于令無從所怙萬一  
分之有答豈可弗爲用罄厥圖莫知攸稱稽合前世詢逮羣工咸  
謂論以孝思大者莫如嚴父求之禮意卑則不可臨尊倘徽稱以  
未加實大典之有闕是用自上帝以請命令元龜而卜辰將垂萬  
世之休奉聯二聖之號謹遣攝太尉皇伯尙書令丞相都元帥宗  
翰奉玉冊玉寶上尊號曰景宣皇帝廟號徽宗 大金集禮

增上孝成皇帝尊諡冊文 大定十九年

維年月日嗣皇帝臣名仰惟太祖武元皇帝命于帝庭神武撥亂

用肇造我區夏顧命之際聖子咸在舍弗以立舉天下大器授之  
太宗文烈皇帝暨天會末命亦弗敢弭忘曰茲先皇令德光昭則  
能賢乃簡畀世嫡神孫丕承基緒十有五年德厚功著厥初封建  
齊人大河之南俾顯綏靖乃罔念付託以率割爲政彼民大弗克  
堪且勸我戍守無有甯歲尙安用而國肆命廢黜于是西踰熙洮  
東極海泗南則唐鄧咸歸我輿圖事不貳適休烈增光于先朝茲  
不曰宏基乎廢宋之餘假息江表我伐再張莫不震疊至籲哀請  
命稱臣底屬乃班師振旅柔服以示懷錫之封冊歲底厥貢七德  
具備茲不曰纘武乎垂拱仰成于懿親宗公穆穆皇皇尊嚴若神  
莊矣黜華尙實元默不言如天之行四時靖矣若稽古假有廟尊  
祖敬宗寅念祀事孝矣綏萬邦屢豐年惟民其康乂成矣豈圖邁  
閔永懷盡傷以迄于今惟冲人繩其祖武蒸蒸業業思所以駿惠  
顧立愛立敬有尊有先莫重于宗廟之享竊惟公則生明名正則  
言順自非推本武元文烈以大義至公相傳授之意用鋪張揚厲



天眷皇統之閔休偉績則何以對越二聖在天之靈雪神孫無窮之遺憾哉不勝大願謹遣攝太尉臣某奉冊上尊諡曰宏基繼武莊靖孝成皇帝廟號閔宗伏惟神靈格思膺是典冊頓首頓首謹言

大金集禮

增上睿宗尊諡冊文 大定三年

臣聞自昔垂訓後世作範故父有天下傳之于子子有天下尊歸于父是以周武克商始制追王之典炎劉興漢方崇太上之名百王相因事貴稽古惟我聖考佐佑祖宗取亂攻昧闢土開基天戈所麾畏威而効順仁澤所被懷德而歸心鄰國興後后之謠簞食致迎師之奉遠邇百姓甯居安業避焚溺于水火足衣食于耕桑皞皞熙熙蓋數十年于茲矣臣猥以眇躬起膺推戴仰念祖宗之丕緒俯察黎庶之誠心君臨萬方凜若御朽敬慎伊始罔敢怠遑載惟與天同功流慶有自行宗社無疆之福發本支百世之祥實聖考允文允武克寬克仁上合天心下從民欲天祿淵源之積匪

一日也爰訪邇臣博採羣議咸謂云云諡議同舉此大綱形容具美僉言既允祇薦鴻名顯揚之微心潛天貺臣不勝大願涓擇吉日遣攝太尉特進平章政事兼太子太師定國公臣完顏宗憲奉玉冊玉寶奉尊諡曰立德顯仁啟聖廣運文武簡肅皇帝廟號睿宗恭惟謨烈有光音容如在俯鑒守成之志尙貽垂裕之休典冊一新昭示萬世 大金集禮

加上世宗尊號冊文 大定十一年

李石

聖人大德必得其名天下懽心以奉其上蓋千歲所接之統是二者相須而成若稽詩書之格言具載帝王之能事巍巍之治發見于都俞赫赫之功形容于雅頌其有賡歌帝作對揚王休匪今則然其來尙矣恭惟祥發上帝統承武元申命用休從民所欲當正隆之失馭聖緒幾危自華表以飛龍皇綱載整方是時也遼餘孽寇肆逆滔天江左新君寒盟爭地爰赫斯怒以修我戎俾凶渠授首以勢窮遐裔革心于理曲蓋天之所助者順而邦其永孚于休



然後體乾元以長人法辰極之居所仁不遠異德惟日新聖而無所不通孝則昭哉嗣服固已鋪閱休揚偉蹟建顯號薦尊名大惟充實之有光未究殊尤之絕跡若夫兢兢業業思政之恆穆穆皇皇臨朝之肅禮法自國貴始威儀作民恭先於其禴祠烝嘗必以齋莊中正憲唐虞之稽古監夏殷以從周大報年豐肇稱郊祀社稷宗廟罔不肅祇山川羣官于茲望秩馨香薦其明德禮樂備于太平惟其學有緝熙是以化成經緯至于燾載之內聲教所加其惟帝臣莫非王土南訛朔易時靡有爭西暨東漸罔不率俾亦由有常德以立武事耀神武以折遐衝如霆如雷于疆于理党項之陪臺稱亂詔始問而伏誅柔然之種落不庭兵一征而獲醜事無遺策師不踰時四海永清諸福畢至故臣民咸尙其慶謂德業有光于前由是稽首颺言竭誠歸美神功不宰蓋亦強爲之名聖度能兼僅得勉俞其請臣以爲懋敬厥德之謂欽化成天下之謂文無思不服之謂廣功成止戈之謂武臣等不勝至願謹奉上玉冊

玉寶加上尊號曰應天興祚欽文廣武仁德聖孝皇帝

大金集禮

宣宗遷座德陵冊文

元光二年

趙秉文

維元光二年歲次癸未十二月己巳朔二十二日庚寅宣宗繼天興統述道勤仁英武聖孝皇帝崩于甯德殿二十八日丙申移殯于大慶殿之兩楹越正大元年三月戊戌朔二十三日庚申遷座於德陵禮也律琯餘寒銅壺未曙慘玉殿之凝霜尙金盤之承露一夕晏出萬里縞素百官血出以如失萬姓風號而靡訴嗟何辜兮考喪差不勝其孺慕哀子嗣皇帝臣痛聖駕之長違哀仙遊之不歸奉綴衣而如在瞻黼展而成非上宰庇司羣公就列覽象物之既陳悵徽音之永隔乃命詞臣流芳寶冊其詞曰  
大金受命傳休累聖薄海內外罔不稟令大安失御不蠲厥政胡馬南牧華風不競皇天祐正命我真入裕陵元子世宗神孫睿謀經遠深略緯文聰明齊聖慈和儉勤欽若帝則駿惠先功科條霜雪號令雷風尊禮百神升秩元祀體貌大臣賓禮名士鰥寡惠鮮



冤滯申理從善如流愛民如子給廩養士闢館集賢罰從未減賞  
惟慶延屯利建侯萃享有廟金壯京城泥封關微至于赦赤子之  
弄兵誅師干之失律恩不閒于疎遠罰不阿于親戚降虜效順以  
革心島夷畏服而獻馘堂上之兵不殺目中之虜如擊方將歸馬  
大漠洗兵中原重新日月再造乾坤吁嗟昊天不弔何言至矣哉  
勤勞天下兮既如彼恩結人心兮又如此胡不萬年僅周一紀禱  
方致于金滕命忽宣于玉几嗚呼哀哉杞國天崩不周地缺寒日  
無光蒼天改色綃幕褰兮凝霜麻衣集兮如雪淚成雨兮萬木冰  
哭成雷兮九泉咽嗚呼哀哉龍輶徐動霓旌前引柳絮漸遙薤歌  
猶挽背天闕之崇峻卽神皋之平衍烏號斷口鼎湖成白雲悠兮  
帝鄉遠遡馳道而皆迴獨宮車兮不返嗚呼哀哉天柱兮崇山虎  
踞兮龍盤千秋兮萬代永閟兮宸顏藏衣冠于天上遺聲烈于人  
間去復去兮九疑黯來不來兮八駿閑嗚呼哀哉如天之生如日  
之明神武電斷蠻夷震驚繩祖武兮孝之大興聖統兮功有成至

德難名神謀莫測超咸五而登三慚漏萬而掛一宜乎享號曰宣  
揚鴻休于罔極嗚呼哀哉

溢水集

上聖穆皇后尊諡冊文

天會十三年

二月十一日乙卯孝孫嗣皇帝臣諱謹再拜稽首言曰臣聞正位  
麗極肇造我家者必資淑聖然後成帝王之功考諡定名昭示厥  
後者非薦徽尊無以見后妃之德繫國朝之令典著今古之彝儀  
伏惟太母博厚配天貞明齊日安順靜慈肅雍塞淵開王化以始  
基篤大倫而正本慶流者遠挺生胄族之華善德在躬秀發閨齡  
之妙言爲圖史動合箴規鏘璜瑀以和鳴容皆中節飾紘緹而整  
治藝則生知粵自高門言歸烈祖時屬經綸之際進膺窈窕之求  
禮未備于造舟志已躬於服澣義爰六子資生允賴于坤儀周亂  
十人同德莫先於文母體參龍躍祥發燕謀贊榛栗以告虔薦蘋  
蘩而昭信必敬必戒至靜至柔教以身而先人化自家而刑國琴  
瑟在御副禕以朝若媯汭之嬪虞用全舜孝邁塗山之興夏實佐



禹功有開必先篤生皇考立子以適肆成渺躬永惟輔佐之憂勞  
既勤祖構宜享治安之逸樂遽棄母儀迄茲纂承彌極攀慕弗獲  
逮事徒瞻服飾之山河未究推尊有感烝嘗之霜露是以秉鈞元  
老蘊禮碩儒謀皆一辭龜得吉卜請奉長秋之號追嚴厚夜之藏  
強爲之名道或存於擬議俄而可測功豈盡于形容謹遣攝太尉  
皇叔祖大司空昱奉玉冊玉寶上尊諡曰聖穆皇后伏惟皇靈在  
天景福昌後衣冠原廟聿從高帝之遊松柏闕宮寅奉姜嫄之祀  
名貽不朽德播無疆嗚呼哀哉

大金集禮

上光懿皇后尊諡冊文

天會十三年

二月十一日乙卯孝孫嗣皇帝臣諱謹再拜稽首言曰臣聞塗山  
麗禹史稱啟夏之功莘國配文詩播興周之美洪惟令德夔掩前  
芳苟非著勤崇垂後之功何以申報本飾終之孝若稽典則允協  
神人恭惟皇后挺生名家來符興運稟是柔嘉之性形爲貞靜之  
姿早以賢稱遂爲聖偶窈窕率禮藹關睢淑女之風儆戒持心得

雞鳴賢妃之道我烈祖登大寶之始而太母正中宮之尊助日宣  
光配天居體躬蘋蘩以奉宗祏服澣濯以訓宮庭至于敬老尙賢  
矜孤閔乏嘗聞國論言必有稽閒預兵機謀無不中厯覽千古實  
惟一人志存社稷之深澤溢子孫之遠逮膺纘紹彌用追懷悵懿  
範之永遠恍徽音之如在致四海之養旣弗及於承顏備萬物之  
儀固無能于稱德尙書政府宗伯禮官僉謂移御舊宮升祔世室  
宜刺六經之載用光百世之傳謹遣攝太尉皇叔祖大司空昱奉  
玉冊玉寶上尊諡曰光懿皇后伏惟俯納精誠昭膺懿號珠襦玉  
匣陪弓劍於軒臺風馬雲車從衣冠於漢廟永綏純嘏幽贊丕圖  
嗚呼哀哉謹言

大金集禮

上欽仁皇后尊諡冊文

天會十三年

八月二十一日乙巳孝孫嗣皇帝臣諱謹再拜稽首言曰昔我皇  
祖誕膺天命肇造區宇用垂統于後世至於太宗聰明勇智克篤  
前烈迄用有成聲教暨于朔南仁恩被于動植天監厥德用錫無



疆之休雖簡在帝心本自神聖而輔佐憂勤實與有力恭惟大行  
太皇太后神靈毓粹圓魄儲精作合皇家儷體宸極儉以約已勤  
以率人陰教行于六宮素風表于千祀用能體資生之道助播物  
之功四海莫不蒙仁二儀于焉饗德雖塗山啟夏涓涘興周無以  
專其美也及先皇厭代哀戚過禮就養東朝德輝彌耀顧性寡昧  
嗣守丕基方賴慈訓庶臻于理而昊穹弗憖大數俄及惘然追懷  
哀恫曷已今者卜筮告吉因山有期爰制近司請明舊典惟舉位  
以定名考諡以尊德所以揚茂美而傳休聲由周而來率用是道  
庶憑徽號以稱褒崇謹遣太尉行會甯牧鄭國王臣裴滿達奉冊  
寶上尊諡曰欽仁皇后伏惟聖靈在天令名不朽光配清廟永世  
無疆嗚呼哀哉謹言

大金集禮

上明惠皇后尊諡冊文

正大八年

維正大八年歲次辛卯十一月癸未朔初八日庚寅哀子嗣皇帝  
臣言昔我烈考宣宗皇帝以裕陵元子復受天命還遷正統紹復

武元之大業亦惟我大行慈聖皇太后來嬪于京天作之合憂勤  
輔佐用共濟于艱難厥初誕育眇躬將正位號以仁聖皇太后德  
冠六宮曰娥英之貴一也讓而不居逮元光末命弗敢弭忘曰此  
先帝之志也乃居太上之尊受養于長樂之宮肆惟冲人嗣無疆  
大厯未堪家難思免厥愆尙賴文母之慈訓不圖昊天不憖降此  
大喪創巨痛殷熒哀茹荼追念宸儀雖闕德音尙存欽惟聖母慈  
仁賦性勞勤夙夜以國步方棘憂心孔疚顧黎民曰念哉征戍勞  
止迄可少休吾母天下忍瘠其子凡諸疾禱皆歸福于元元疾迫  
彌留遺命薄葬臣哀痛不忍從重違顧命伏念正位以定名考諡  
以尊德厥有舊章倘非丕彰聖母之鴻休懿德則何以對越在天  
之靈慰孝思罔極之勤哉深詔禮官詳議諡法式稽古義敢薦大  
名伏以蘊先物之幾體懷冲之德紫宮竝耀黃道偕升茲不曰明  
乎以載物之量包逮下之仁子惠無疆坤儀攸贊茲不曰惠乎謹  
按諡法獨見先識曰明恩能及下曰惠肅涓穀旦爰舉上儀謹奉



玉冊玉寶上尊諡曰明惠皇后伏冀聖靈俯賜鑒臨歆受典冊垂  
裕無窮嗚呼哀哉謹言

以上原集

卷九

皇統元年

立貴妃裴滿氏爲皇后冊文

皇帝若曰夫地承天而效法所以合德無疆月遡日而生明故能  
容光必照是以有國有家者必選立嘉配以上承宗廟而降德于  
臣民古今一也我國家累聖重光開基垂統用端命于上帝亦惟  
內德相繼匹休姜任燕謀所貽敢忘紹述咨爾裴滿氏柔惠端淑  
得于天成發慶鍾祥世有顯聞自越初載來嬪潛邸笄珈組率  
履無違逮朕纂服章明婦順表率勤劬陰教修明雖已崇建位號  
而典冊未舉朕意歉然今遣太尉裴滿胡達攝司徒昂持節授爾  
冊寶副禕重翟宏賁用光備物充庭一遵古禮朕惟王業所基率  
由內治和睦自中化馳如神爾克勤人用弗敢棄日爾克儉人用  
弗敢崇侈爾克正人用弗敢迂乃心倚乃身勉思其終惟慎乃濟  
天其申命于我家爾亦永膺多福豈不韙歟

大金集禮

立皇子濟安爲皇太子冊文

皇統二年

禮典之垂訓鑒重世嫡所以丕敘人倫帝王之御邦家建儲闡所  
以其承宗廟朕紹隆基緒祗慎夙宵荷三靈眷顧之休開億載流  
光之福自中宮而錫羨慶上嗣之應期歷修曠世之儀豈厭普天  
之意誕敷庭號播告縉紳皇子濟安毓秀天潢分輝辰極寢興占  
夢稔聞漢后之日符經緯儲精允協周家之聖瑞沈厚積山川之  
氣溫文全金玉之姿乃者元宰獻謀近臣演議謂前代少陽之兆  
多育于朱藩而後宮甲觀之徵不專于椒掖尙預崇于國本以外  
係于人心豈如皇朝盡軼隆古宜涓歲月之吉茂揚典冊之光上  
以答祖考之歡下以副臣民之望言之甚切義不得辭肆因翦鬢  
之辰俾正承華之位方當延老成爲羽翼之輔建僚案相朝夕之  
恭匪我一人之私惟爾萬方之慶於戲僉言協卜旣從蚤建之功  
幼歲親師庸助夙承之德宜非謀非彝之勿用廣正言正事之常  
聞勉思求稱之難永錫無疆之福

大金集禮



命宋康王爲皇帝冊文

皇統二年

皇帝若曰咨爾宋康王趙構不弔天降喪於爾邦亟瀆齊盟自貽顛覆俾爾越在江表用勤我師旅蓋十有八年于茲朕用震悼斯民其何罪今天其悔過誕誘爾衷封奏狎至願身列於藩輔今遣光祿大夫左宣徽使劉筈等持節冊命爾爲帝國號宋世守臣職永爲屏翰嗚呼欽哉其恭聽朕命

金史

立張邦昌冊文

天會五年

維天會五年歲次丁未二月辛亥朔二十有一日辛巳皇帝若曰朕惟我太祖武元皇帝肇造區夏務安元元肆朕纂承不敢荒怠夙夜兢兢思與萬國同格于治粵惟有宋實乃通鄰貢歲幣以交歡馳星輶而講好期于萬世永保無窮蓋我有大造于宋也不圖變誓渝盟以怨報德構端招禍反義爲仇譎詐成俗貪婪不已加以肆行淫亂不恤黎元號令滋彰紀綱弛紊況所退者非其罪所進者非其功賄賂公行豺狼塞路天厭其德民不聊生而又姑務

責人罔知省己父既無道于前子復無斷於後以故徵師命將伐罪弔民幸賴天高聽卑神幽燭細旌旄一舉都邑立摧但眷命攸屬謂之大寶苟歷數改卜未可偷安故用黜廢以昭元鑒今者民既乏主地宜混同然念厥初誠非貪土遂命帥府與眾推賢僉曰大宰張邦昌天毓疏通神姿睿哲處位著忠良之譽居家聞孝友之名實天命之有歸乃人情之所僣擇其賢者非子而誰是用遣使特進尚書左僕射同知樞密院事監修國史上柱國南陽郡開國公食邑三千戶食實封二百戶韓資政副使榮祿大夫行尚書禮部侍郎提點大理寺護軍譙國縣開國侯食邑一千戶食實封一百戶曹說持節備禮以璽紱寶冊命爾爲皇帝以授斯民國號大楚都于金陵自黃河以外除西夏封圻疆場仍舊世輔王室永作藩臣貢禮時修爾勿疲於述職問音歲至我無緩于披誠於戲天生蒸民不能自治故立君以臨之君不能獨理故署官以教之乃知民非后不使后非賢不守其于有位可不慎歟予懋乃德嘉



乃不績日慎一日雖休勿休往欽哉其聽朕命北盟會編參大金  
國志大金弔伐錄程史揮塵後錄偽楚錄

立劉豫冊文

天會八年

維天會八年歲次庚戌七月辛丑朔二十有七日丁卯皇帝若曰  
朕聞公于御物不以天下爲己私職在牧民迺知王者爲公器威  
罰既已殄罪位號宜乎授能迺者有遼運屬顛危數窮否塞獲罪  
上帝流毒下民太祖武元皇帝杖黃鉞而拯黔黎麾白旄而誓軍  
旅妖氛既掃區宇式甯爰有宋人來從海道願輸歲幣祈復漢疆  
太祖方務善鄰卽從來議豈期天方肇亂自啟釁階陰結叛臣賊  
虐宰輔招集姦慝擾亂邊陲朕纘承仰循先志姑存大體式示  
函容迺復蔽匿逋逃夸大疆域肆其貪很自起紛爭擾吾外屬之  
藩鄰取其受賜之疆土因彼告援遂與解和終莫聽從巧爲辭拒  
爰命將帥諄諭盟言許以自新終然不改偏師傳汴首罪奔淮嗣  
子哀鳴請復權好地畫三鎮誓卜萬年凡有質要悉同父約旣而

官軍未退夜集眾以犯營誓墨纔乾密傳檄而堅壁私結使人陰  
構事端以故再遣師徒詰茲敗累又起畫河之議復成款戰之謀  
旣昧神明迺昭元鑒京城摧破鼎祚淪亡無併爾疆以示不貪之  
德止遷其主用彰伐罪之心建楚新封守宋舊服庶能爲國當共  
息民不料懦夫難勝重任妄爲退讓反陷誅鋤如構者宋國罪餘  
趙氏遺孽家乏孝友國無忠勤銜命出和已作潛身之計提兵入  
衛反爲護己之資忍視父兄甘爲俘虜事雖難濟人豈無情方在  
殷憂樂稱僭號心之幸禍於此可知乃遣重兵連年討捕比聞遠  
竄越在島夷重念斯民亂於無主久罹塗炭未獲昭蘇不委仁賢  
孰能保定咨爾中奉大夫京東西淮南等路安撫使兼諸路馬步  
軍都總管知東平府節制大名開德等府濮博濱棣德滄等州劉  
豫夙擅直言之譽素懷濟世之才居於亂邦生不遇世百里雖智  
亦奚補於虞亡三仁至高或願從於周仕當姦賊擾攘之際正愚  
氓去就之間舉郡來王奮然獨斷逮乎厯試厥勳克成委之安撫



德化行任之尹牧獄訟理付之總戎盜賊息專之節制郡國清況  
有定衰救亂之謀必挾拯變扶危之策使民無事則橐弓力穡有  
役則釋耒荷戈罷無名之征捐不急之務徵隱逸舉孝廉振紀綱  
修制度省刑罰而去煩酷發倉廩而息蠹螟神人以和上下協應  
比下明詔詢考輿情列郡同辭一心仰戴宜卽始歸之地以昭建  
業之元是用遣使留守西京特進檢校太尉尚書右僕射大同尹  
兼山西兵馬都部署上柱國廣陵郡開國公食邑二千戶實封二  
百戶高慶裔副使金紫光祿大夫尚書禮部侍郎知制誥護軍南  
陽縣開國侯食邑一千戶實封二百戶韓昉備禮以璽紱寶冊命  
爾爲皇帝國號大齊都於大名府世修子禮永貢虔誠錫爾封疆  
並從楚舊更須安集自相攸居爾其上體天心下從人欲忠以藩  
王室信以保邦圻惟天難謀惟命靡常常厥德保厥位爾其勉哉  
勿忽朕命北盟會編參建炎以來繫年要錄大金國志大金弔伐錄

進封劉豫曹王冊文

皇統二年

門下嚴寶冊以薦鴻名既俯從於眾欲布恩書以敷霈澤宜大渙  
于羣生眷子異姓之王夙有同寅之德肆班明命孚告治朝蜀王  
劉豫敦大而直方高明而寬厚早居南服以直言強諫聞於時頃  
在東州以智略英姿長于眾八年享國一節事君審運會之有終  
識廢興之大義視去位如脫屣以還朝若登仙向之富國以強兵  
何霸王之足道今也樂天而知命豈得喪之能移爰因慶賞之行  
益示褒封之典胙以陶邱之壤易其井絡之封於戲列土以建侯  
邦誓以堅於帶礪盡忠以藩帝室心宜炳若丹青茂對寵光永綏  
福履可進封曹王食邑一萬戶食實封一千戶仍令有司擇日備  
禮冊命主者施行北盟會編

封高麗恭孝王冊文

皇統二年

昔先王疆理天下錫命六服率爾世守用丕協于大公肆朕君臨  
若稽隆古亦惟崇德象賢以奉若天道咨爾楷英氣邁往淑質純  
茂粵自早歲以孝友誠敬事親有聞述其纘承祗德彌邵眷爾先



哲克篤忠貞以謹事大邦懷保惠訓載祀數百用貽燕于爾躬爾亦迪知忱恂夙夜兢業芟刈崇激式克敬典乃增裕於前烈朕甚嘉之越茲既累年而典冊未稱大懼怫鬱公議今遣使持節冊命爾為儀同三司柱國高麗國王永為我藩輔嗚呼惟天難忱惟命不于常人之攸好德降之百祥義之庸強自取弱勿矜于貴勿溢于富勿敢怠于宴康聽予一人之彝訓以饗受多福其以有民世享豈不偉歟

高麗史

封高麗光孝王冊文 大定十二年

崇德象賢若稽于古承家開國以正其功粵惟表海之舊封未艾如川之多祚所從來遠雖子孫勿替其傳惟不于常有兄弟相及之道世將于是享德人亦宜無閒言爰契師虞往敷天寵咨爾皓遠大以為任賢明而自將地處彼邦之懿親才雄爾眾之令望繫乃祖乃父實維藩維垣前列用宏嗣賢不乏蓋根深則枝茂積厚者流光餘慶曷歸汝躬是任屬友于之疾其殆不瘳推公爾之心

自為克讓申以敷奏達于聽聞是成斯美於大倫代厥後於先正今遣使命爾為開府儀同三司高麗國王永為藩輔嗚呼社稷既有所授夙夜罔或不勤律乃邦民謹爾侯度禍福惟人所召切戒于淫佚驕邪夙夜畏天之威庶可以安甯長久罔曰弗克惟既厥心往哉惟休無替朕命

高麗史

封高麗元孝王冊文 崇慶元年

朕操馭貴之資職代天之命凡預疏榮之列必崇過厚之恩矧爾東藩謹乃侯度頃屬受承之際克敦揖讓之風載閱來章特從允許權高麗國事王禩性資愷悌學問淵源內推樂善之誠外蔚好賢之望稽之理命則有協假以政權則克勝使付囑者得稱知人傳授者果為有託顧茲一舉豈非兩全是用正爾真封豐斯親渥於戲摠山海五部畀之茅社加車服九命煥其旂章尚肩忠蓋之心益體寵綏之意勉修爾職祇服朕言可特授開府儀同三司上柱國高麗國王食邑一萬戶食實封一千戶仍令有司擇日備禮



冊命

高麗史

封長白山神為靈應王冊文

大定十五年

惟年月日皇帝若曰自兩儀剖判山嶽神秀各鍾於其分野國將  
 興者天實作之對越神休必以祀事故肇基王迹有若岐陽望秩  
 山川于稽虞典厥惟長白載我金德仰止其高實惟我舊邦之鎮  
 混同流光源所從出秩秩幽幽有相之道列聖蕃衍熾昌迄于太  
 祖神武徵應無敵於天下爰作神主肆予冲人紹休聖緒四海之  
 內名山大川靡不咸秩矧王業所因瞻彼早麓可儉其禮服章爵  
 號非位于公侯之上不足以稱焉今遣某官某持節備物冊命茲  
 山之神為興國靈應王仍勅有司歲時奉祀於戲廟食之享互萬  
 億年維金之楨與山無極豈不偉歟

大金集禮

封大房山神為保陵公冊文 大定二十一年

維年月日皇帝若曰古之建邦設都必有名山大川以為形勝我  
 國家既定鼎於全燕西顧郊圻巍然大房秀拔混厚雲雨之所出

邱墟萬民之所瞻仰祖宗陵寢於是焉依仰惟嶽鎮古有秩序皆  
 載祀典矧茲大房豈可獨闕其禮哉其爵號服章俾列于侯伯之  
 上庶足以稱今遣某官某備物冊命茲山之神為保陵公申勅有  
 司歲時奉祀其封域之內禁無得樵採弋獵著為憲令使草木禽  
 蟲各遂其性所以廣先聖之德澤而報神之功也於戲享之廟食  
 錫乃多儀祐列聖以安安期億年而有永以篤金祐時為神休

大金集禮

封瑪達格山神為瑞聖公冊文

明昌四年

皇帝若曰國家之興命歷攸屬天地元化惟時合符山川百神無  
 不受職粹精薦瑞明聖繼生著丕應於殊禎啟昌期于幽贊哀對  
 信猶之典咸修望秩之文嘉乃名山奠茲勝地下綿乾分上直樞  
 輝盤析木之津達中原之氣廓除氛祲函毓太和仰惟光烈昭垂  
 徽音如在即高明而清暑克靜嘉以安仁周廬安甯厚澤浹洽朕  
 祇循祖武順講時巡感美號以興懷佩聖謨而介福言念誕彌之



初度抑由翊衛之效靈然猶祀秩無章神居不屋非所以盡崇德報功之義副追始樂原之心爰飾名稱載修祠宇勒忱詞于貞石涓良日子元龜彰物采以辨威潔廢縣而致祭闡揚茂實敷繹多儀今遣使某副某持節備物冊命神為瑞聖公仍勅有司歲時奉祀於戲尚有聰明欵此誠意孚休惟永亦莫不甯

封靜甯山神為鎮安公冊文

明昌六年

皇帝若曰古之名山咸在祀典軒皇之世神靈所奉者七千虞氏之時望秩每及于五載蓋惟有益于國是以必報其功逮乎後王申以徽冊至于嶽鎮之外亦或封爵之加故太白有神應之稱而終南有廣惠之號禮由義起事與時偕載籍所傳于今猶監朕修和有夏咸秩無文眷茲靜甯秀峙朔野緼澤布氣幽贊乎坤元導風出雲協符乎乾造一方之表萬物所瞻南直都畿北維障徼連延廣厚寶藏攸興盤固高明諺宮斯奠昔有遼嘗恃以富國迄大定更為之錫名洪惟世宗功昭列聖亦越顯考德利生民爰即歲

時駕言臨幸兵革不試遠人輯甯雨暘常調品彙蕃庶此上帝無疆之貺亦英靈有相之符比即輿情載修故事顧先皇帝駐蹕之地揖累世承平之風迺續遺休式甄神祐肆象德以昇號仍班台而闡儀宇像一新采章具舉今遣使某副某持節備物冊命神為鎮安公仍勅歲時奉祀於戲容典焜燿精明感通惟永億年翊我昌運神其受職豈不偉歎

金史

封混同江神為應聖公冊文

大定二十五年

昔我太祖武元皇帝受天明命掃遼季荒蕪成師以出至于大江浩浩洪流不舟而濟雖穆滿渡江而鼉梁光武濟河而水冰自今觀之無足言矣執徐之歲四月孟夏朕時邁舊邦臨江永歎仰藝祖之開基嘉江神之効靈至上都議所以尊崇之典蓋古者五嶽視三公四瀆視諸侯至有唐以來遂享帝王之尊稱非直後世彌文而崇德報功理亦有當然者矧茲江源出于長白經營帝鄉實相興運非錫以上公之號則無以昭答神休今遣某官某持節



備物冊命此江之神為興國應聖公申命有司歲時奉祀於戲巖  
廟貌正封爵禮亦至矣惟神其衍靈長之德用輔我國家彌億年  
神亦享廟食於無窮豈不休哉

大金集禮

劉豫立妻錢氏為后冊文

門下朕肇造區夏聿崇王化之基正位宮闈允賴坤儀之助爰昭  
懿範協建丕圖敷告明廷誕揚顯冊咨爾錢氏性鍾婉靜德茂肅  
恭嬪于節制之初嘉爾宜家之美慶傳乃祖德及于民啟吳越之  
王封衝斗牛之瑞氣名家濟美遠踰高密之門邦媛流芳益顯臨  
安之裔建茲創業繫乃協心增厚人倫思繼關雎之化敬修婦禮  
欣承長樂之歡宜正徽名式資內治禕衣綸翟遠稽周室之儀椒  
屋蘭闈靡效漢家之侈蓋遵典禮匪徇恩私於戲惟守恭儉可以  
御純樸之民必務憂勤可以副勵精之意書稱媯汭匹虞舜以膺  
圖詩詠洽陽配周王以受命勉師令德永播徽音可立為皇后仍  
令有司擇日備禮冊命施行

北盟會編參偽齊錄  
以上原列卷十



金文最卷五

金文最卷六目錄

制誥

立貴妃裴滿氏為皇后制 天眷元年

立楚王為皇太子制 大定八年

立原王為皇太孫制 大定二十七年

道陵真妃制

增上祖宗諡號大赦天下制 皇統五年

受尊號大赦天下制 大定七年

受加上尊號制 大定十一年

皇子生大赦天下制 皇統二年

陳王悟室加恩制 天眷二年

許道真致仕制

擬除樞密使制 正大元年奉都堂鈞旨作

擬除司農卿制 正大元年奉都堂鈞旨作



降封遼主為海濱王制 天會三年

降封昏德公制 天會六年

降封昏德侯制 天會六年

孔元措襲封衍聖公誥 明昌二年

超授孔元措中議大夫仍賜四品誥 明昌二年

前御史大夫張暉贈父萃卿誥

參知政事李蹊授左丞誥

鐵券文

賜國用安鐵券文

策問

試女直進士策 大定十三年 以上原列卷十一

立原王為皇太孫謝表 大定二十六年

立裴滿氏為皇后謝表 天眷元年

章宗  
悼平皇后

上太祖諡號表 天會三年

賀俘宋主表 天會五年

賀俘宋主表 天會五年

上熙宗尊號表 皇統元年 見文雅

上世宗尊號表 大定五年 見文雅

再上世宗尊號表 大定五年

賀宋畫河請和表 天會五年

加上世宗尊號表 大定十一年

加上世宗尊號第二表 大定十一年

加上世宗尊號第三表 大定十一年

賀追尊皇考妣禮成表 天會十三年

請受尊號禮冊表 大定六年

奉安三聖御容羣臣賀表 大定十九年

立原王為皇太孫羣臣賀表 大定二十六年 以上原列卷十二

完顏杲  
完顏杲  
宗憲  
宗憲  
宗憲  
劉彥宗  
李石  
李石  
李石



金文最卷六

昭文張金吾月霄輯

制誥

立貴妃裴滿氏為皇后制

天眷元年

易基乾坤以大陰陽之統詩經夫婦乃先后妃之風故三代之令  
 王謹六宮之內職況承宗廟儷辰極以居尊用正人倫揭母儀於  
 無外事所繫者甚重道相須而後成非朕敢私自天作配猗與誰  
 氏乃茂徽音若稽舊章誕布寵命貴妃裴滿氏慶鍾戚里教肄公  
 宮夢月方娠生而固異倪天之妹卜則允臧爰用聘於先朝乃來  
 嬪于初載禮肅舅姑之奉訓無師傅之違道著家人名膺邦媛逮  
 子宅統率履在中承祀孔夤睦親盡孝蹈貞賢之警戒知臣下之  
 勤勞纘女維行輔服不逮居軒后四星之列貴則益恭在周官六  
 服之儀缺然未講宜蠲吉且正位長秋於戲為望甚尊有同乎天  
 地流風自近以至于家邦言雖戒於闔踰令莫據于身正恩宜逮



下志務求賢非儉德不能懲奢泰之風去私謁可以贊正直之道  
慎終如始永孚於休 大金集禮

立楚王爲皇太子制 大定八年

朕恭膺景命夤奉丕圖既承九廟之尊深惟固本庶係四海之望  
用永皇基斯古昔之宏規亦邦家之先務天與上嗣慶自中宮紹  
中國之建儲稽禮經而立嫡肆遵彝典式示寰區皇子楚王某資  
賦聰明才兼文武剛健而循理端厚而寡言從師友則進學敏修  
道古今則經耳成誦造庭匪懈見孝敬於問安養志無違表忠勤  
於視膳至于疏封大國益盡小心操履謙和姿儀肅謹蓋神明之  
胄稟異而天地之祐茲宏是宜叶繼照於明離觀主鬯於游震上  
以纂祖宗創業之緒下以慰臣民引領之誠其以某爲皇太子仍  
令有司擇日備禮冊命主者施行布告中外咸使聞知 大金集禮

立原王爲皇太孫制 大定二十七年

朕膺上天之眷命紹列祖之宏基惟懷永圖早定元嗣上以承休

于累祖下以係望於多方嗟繼體之云亡賴貽謀之有託蓋天下  
大器可不正其本歟而世嫡皇孫所謂無以易者矧其賢德之著  
宜貳宸極之尊肆舉彝章式孚有眾皇孫開府儀同三司尙書右  
丞相原王某祥開甲觀秀出天支夙挺溫文日隆孝敬性資超異  
自幼已若于成人學問明敏所得必臻于至理昨進封于王社俾  
作牧于神州政成于旬月之閒美審乎輿人之誦爰立作相歷試  
諸難並彰時序之能大副師言之錫願垂統必資於善繼而奉鬯  
不可以久虛是用正名茲惟合禮今立某爲皇太孫所有合行典  
禮宜令有司條奏以聞布告中外咸使聞知 大金集禮

道陵眞妃制

古有六寢式奉宸闡天垂四星蓋臨北極朕祗承先帝敬建掖妃  
載頒優異之恩以對柔嘉之則休符佐相早立邃庭左右圖史之  
規進退珩璜之節彤管有煒象服是宜用光四德之書仍侈六珈  
之飾嗚呼攀軒龍而莫及望絕鼎湖悵蒼梧之莫返魂銷澧水惟



德徽之益遠宜命數之倍敦尙深送往之誠愈保安貞之吉

隆水

增上祖宗諡號大赦天下制

皇統五年

朕聞大一統以居尊必推功於祖考交三靈而儲佑當均慶於臣民國家敕命惟時重光莫麗純德符于軒昊大功軼於禹湯肆朕纂承敢忘駿惠而廟諡所紀德美未詳凜夙夜之靡甯集臣鄰而博議謂祖有功而宗有德雖已祇率于舊章若敬所尊而愛所親尙克繼成于先志肆涓良日肇舉上儀神靈居歆中外胥悅宜廣配天之澤永昭凝命之休可大赦天下內外大小職官並與覃恩於戲嗣恭德于前人其無過佚得歡心于四海庶格燕甯更賴三事宗工百司庶正益懋贊襄之意弼成繼述之功

大金集禮

受尊號大赦天下制

大定七年

朕以菲德獲承至尊賴祖宗燕翼之謀啟國家興復之運以至邊鄙撤警民人奠居永思積累于咸平何敢康甯于夙夜鴻名顯冊

實所未遑懇請交章誠難固拒乃涓穀旦昭受上儀既揚對天之休宜厚錫民之福可大赦天下內外大小職官並與覃恩

大金集禮

受加上尊號制

大定十一年

朕以祖業維艱天下至大圖維負荷莫敢荒甯賴九廟貽謀三靈協贊仁征義伐時靡有爭長治久安慮無遺策諸福之物畢至萬邦之年屢豐邇者于羽敷文郊宮肆祀禮樂明備神祇燕甯是皆多助之致然豈獨眇躬之能爾而羣工在列徽號見加懇請既堅再辭不獲載余俯從于眾欲亦將上合于天心肆膺備物之儀用答樂推之望今已勉受應天興祚欽文廣武仁德聖孝之號嗚呼政成則歸美效當通上下之情有大而能謙敢自忽盈成之守布告遠近咸使聞知

大金集禮

皇子生大赦天下制

皇統二年

禮重世嫡爲其承七廟之尊國有元良所以繫萬邦之望顧惟菲



德獲紹丕基勤以恤民居軫夙宵之念約於奉已敢親聲色之娛  
豈惟中外之共知抑亦神明之所鑒荷三靈之錫羨祐累聖之重  
光慶集中宮時生上嗣宗社奉鬯已肇應於震方雷雨發春宜均  
敷於解澤嘉與億兆同茲懼怵可大赦天下云云於戲辰象著明  
於赫前星之耀恩書寬大助宣冲氣之和更賴三事大夫百司庶  
府共欽承於德意期式敘于民彝永沐淳風翕臻神域

陳王悟室加恩制

天眷二年

貴貴尊賢式重儀型之望親親尚齒亦優宗族之恩朕俯迫羣情  
祇膺顯號爰第景風之賞孰居台曜之先凡爾在廷聽予作命具  
官屬爲諸父身相兩朝蹈五常九德之規爲四輔三公之冠當艱  
難創業之際藉左右宅師之勤如獻兆之信著龜如濟川之待舟  
楫迪我高后格于皇天屬正統之有歸賴嘉謀之先定緝熙百度  
董正六官雍容以折肘腋之姦指顧以定朔南之地德業並茂古  
今罕倫迨茲慶賜之頒詢及僉諧之論謂上公之加命有九而天

下之達尊者三既已兼全無可損益乃敷求于載籍仍自斷於朕  
心杖以造朝前已加於異數坐而論道今復舉於舊章蕭相國賜  
詔不名安平王肩輿升殿併茲優渥以獎耆英於戲建無窮之基  
則必享無窮之福錫非常之禮所以報非常之功欽承體貌之隆  
共對邦家之祉

松漠紀聞

許道真致仕制

安車蒲輪天子所以厚優賢之禮黃冠野服人臣所以遂歸老之  
心其恩榮足以兩全而前後不可多得有臣如此如卿幾人具官  
道直以方氣剛而大議論非世儒所到名節以古人自期擢自先  
朝置之諫列斥安昌竊位已聞折檻之忠及梁冀伏辜方覓埋輪  
之志朕初卽大位稔聞直聲起之于田里退閑之閒超之于侍從  
論思之地完備始終之節從容進退之閒歎陽城之敢言惜其將  
去念孔戣之旣老挽之莫留特進一階榮躋四秩華山拂袖最是  
爲世上之閒神武挂冠猶不負山中之相勉終晚節益介壽祺



擬除樞密使制

正大元年奉都堂鈞旨作

在天垂象璣衡通紫極之嚴稽古象賢宥密極洪樞之峻故非智  
辯無窮則不足以語成敗安危之要非威望素重則不足以馭梟  
俊強悍之臣敷求天下之奇才以屬國家之大計誕告于眾余得  
其人具官某沈鷺有謀矜嚴不撓達用兵之善志厲許國之精忠  
戎陣有年膚公屢奏出奇應變森然武庫之雄厭難折衝隱若長  
城之固屬機庭之虛職容羣牧以擇賢才氣無雙士皆樂屬李廣  
策慮億億時則有若陳湯是用假以本兵之權置諸右府之長於  
戲漢有汲長孺邪謀寢于淮南唐相李文饒威令行於河朔蓋屈  
人貴乎不戰而銷患在於無形予將以中興而責成爾其以上策  
而自任尚恢遠略無及近功

遺山集

擬除司農卿制

正大元年奉都堂鈞旨作

田政維天下之大綱古有播百穀之命農臣分戶曹之外務今為

治六府之官況假以部使者之權位于中執法之次自非智數足  
以豐財賦風采足以動縉紳則何以察吏治之否臧究貨源之通  
塞疇若子采僉曰汝諧具官某志大而氣剛智明而才邵遇事不  
滯若然新發之鋒挺身而前凜乎後彫之節自預時髦之選浸階  
華貴之游蔚為名臣簡在朕聽是用進以稽臣之貳委茲邦計之  
繁朕惟西北用兵以來朝廷多事之際斂散之術既廢罪功之辨  
不明官必仰給于創罷之民或重困于侵漁之吏蓋基本急于  
愛養而綱紀貴乎設張朕方以一道之事而責成爾得以三載之  
功而自効於戲生之有道則財恆足率之以正則令必行劉晏之  
輕重相權算不忘于馬上范滂之澄清自任志已見于車中罔俾  
斯人專美于世

遺山集

降封遼主為海濱王制

天會三年

敕可大遼皇帝延禧定矣廢興之數孰謂任天迹其榮辱之來無  
非象德從古已降其事皆然以爾長惡謂之不君積釁至于亡國



比讒逆諫侮聖矜能烝淫見亂于人倫驕佚不移于本性銅山屬  
弄臣之輩金穴藏外戚之家對之終日無話言行之常代惟亂政  
淫刑以逞視妻子如豺狼典禮不修輕人臣如犬馬旋聞中外大  
紊紀綱朋邪與忠正無分優倡其后妃雜處室如懸磬猶能峻宇  
雕牆人之流離不輟從禽逐獸邦之机隍民曰怨咨方當降罰之  
時更稔怒鄰之意蕩搖我邊鄙招納我叛亡爰自先朝以修武事  
我師直而順動彼勢屈以自摧曾于奔走之間輒有和成之請卽  
爲恩義許結兄弟更張美矣之辭矯示友于之字孽旣自作禍從  
此深骨肉見俘宗廟失守疇昔大勢已謝往銜去國之悲于今後  
事何爲莫有逃天之計自知窮蹙方以歸投然嘉來意之甚勤其  
柰罪條之具在旣爲天之廢棄又爲民所仇讐加之斧鉞則豈謂  
無名投諸魍魅則誰云不忍事難與恕朕固合爲載念取亂覆昏  
屬兵武有成之舉繼絕興廢是國家非常之恩免降新封止除舊  
號可封爲海濱王其供帳安置並如典例嗚呼朕循故事無專已

以妄爲爾有前非宜撫躬而內省祇服厥命以保乃身故茲詔示  
想宜知悉

大金弔伐錄

降封昏德公制 天會六年

制詔佶曰王者有國當親仁而善鄰神明在天可忘惠而背義以  
爾頃爲宋主請好先皇始通海上之盟求復山前之壤因嘉懇切  
曾示允俞雖未夾擊以助成終以一言而賜予星霜未變釁隙已  
生恃邪佞以腹心納叛亡爲牙爪招平山之逆黨害我大臣違先  
帝之誓言愆諸歲幣更邀回其戶口惟巧尙于詭辭禍從此開孽  
因自作神人以之激怒天地以之不容獨斷旣行諸道並進往馳  
戎旅收萬里以無遺直抵京畿豈一城之可守旋聞巢穴俱致崩  
分大勢旣以云亡舉族因而見獲悲銜去國計莫逃天雖云忍致  
其刑章無柰已盈于罪貫更欲與赦其如理何載念與其底怒以  
加誅或傷至化曷若好生之惡殺別示優恩乃降新封用遵舊制  
可封爲昏德公其供給安置並如典禮嗚呼事益稽于往古曾不



妄為過惟在于爾躬切宜循省祇服朕命可保諸身 大金弔伐錄

降封昏德侯制 天會六年

制詔桓曰視頹綱以弗張繼何以舉偏覆轍而靡改載或爾輸惟  
乃父之不君忘我朝之大造嚮因傳位必冀改圖且無悔禍之心  
翻稔欺天之惡作為多罪矜恃姦謀背城下之戴恩不割三鎮搆  
軍前之二使潛發尺書自尊難逃我伐再舉兵士奮威而南指將  
臣激怒以前驅壁壘俱摧郡縣繼下視井惟存乎茅經濟河無假  
于葦航豈不知口徒嬰城中果為我獲出詣軍前尋敕帥臣使趨  
朝陛罪誠無赦當與正於刑名德貴有容特優加于恩禮用循故  
事俯降新封可封為昏德侯其供給安置並如典禮嗚呼積毀自  
於汝躬其誰可恕降罰本乎天性豈朕妄為宜省前非敬服厥命  
大金弔伐錄

孔元措襲封衍聖公誥 明昌二年

聖謨之大儀範百王德祚所傳垂光千祀蓋立道以經世宜承家

之有人文宣王五十一代孫孔元措秀阜衍祥清洙流潤芝蘭異  
稟蔚為宗黨之英詩禮舊聞蚤服父兄之訓語年雖妙論德已成  
肆疏世爵之封仍煥章身之數非獨增華于爾族固將振耀于斯  
文勉嗣前修用光新命 祖庭廣記

超授孔元措中議大夫仍賜四品誥 明昌二年

夫子既沒千八百年後人相承五十一世自近古已公其爵顧散  
階如彼其卑必也正名難于仍舊是以興百王之曠典峻五品之  
華資茲以爾有成人之風繼將聖之後當余定格會爾疏封噫廟  
貌存焉克謹歲時之祀家聲久矣無忘詩禮之傳學有餘師善將  
終譽 祖庭廣記

前御史大夫張暉贈父萃卿誥

昔石建有醇德而一家萬石袁氏著仁心而四世五公古有其人  
今乃親見某以德行為世檢以文學登世科孫則尚書子惟御史  
門閭之懿近代罕聞推其從來自爾素積生而冠萬人之高選沒



而膺一品之追崇其有知乎亦足榮矣

溢水集

參知政事李蹊授左丞誥

君不借才於異代所資者當世之英豪天將降任于是人必付以大賢之事業朕以寡昧獲紹基圖念祖宗開創之艱思社稷久長之計而四郊多壘羣生未甯提封未入於版圖陵寢尙霑於霜露中夜以歎茲心靡皇期得英偉絕俗之才以濟險阻非常之運疇若予采今得其人具位李蹊器識邁倫才猷經世以文雅飾吏事以術業贊廟謀比長外臺辭宣之政事已試召還中省張鎬之籌策甚良是用貳我機衡進之丞轄嗚呼承平之世中庸談笑而有餘多難之時賢哲馳驚而不足身濟大業力恢中原幸得遭時其任以天下之重毋以有己或負于人主之知勉盡乃心以稱朕意可改授尙書左丞兼修國史加上柱國餘如故

溢水集

鐵券文

賜國用安鐵券文

皇帝若曰咨爾內族英烈戡難保節忠臣儀同三司都元帥兼平章政事究王完顏用安大邦惟屏古有格言王府策勳賞存舊典卿台階孕秀海岳儲靈天賦忠貞性資明敏初爲兒戲營壘已成長學神機風雲暗曉方將提挈義旅勤勞王家服金革以不辭冒矢石而有勇頃遭逢於多壘偶陷沒于他邦而能臨事見機去僞從正變疾風雨謀先鬼神一舉而患難殄殲不時而州縣皆復聽聞如此歎矚久之朕方總攬英雄興建功業體天地含宏之德厚君臣始終之恩胙爾以諸王之封寵爾以上公之位氏族已書于玉牒勳業復紀于太常蓋欲宥及于十世閒嫌恩積於一門泰山黃河永及爾裔皇天后土實聞斯言肆申白馬之盟庸示丹書之約嗚呼謂予不信鑒詩人皦日之辭弗與同心如文公白水之誓尙奉非常之渥以承無疆之休

玉堂嘉話

策問

試女直進士策

大定十三年



賢生于世世資于賢世未嘗不生賢賢未嘗不輔世蓋世非無賢  
惟用與否若伊尹之佐成湯傅說之輔高宗呂望之遇文王皆起  
耕築漁釣之閒而其功業卓然後世不能企及者蓋殷周之君能  
用其人盡其才也本朝以神武定天下聖上以文德綏海內文武  
並用言小善而必從事小便而不棄蓋取人之道盡矣而尙憂賢  
能遺于草澤者今欲盡得天下之賢而用之又俾賢者各盡其能  
以何道而臻此乎

金史  
以上原列卷十一

表

立原王爲皇太孫謝表

大定二十六年

章宗

端門宣詔方渙鴻恩宸御臨軒載昭茂典祇膺寵數倍積兢慚伏  
以豫建儲闈號稱國本仰以守宗祧之祀俯以系天下之心匪有  
元良疇諧師錫伏念臣年方冲弱性本庸虛猥承世嫡之名優荷  
聖恩之託始從羣爵改昨國封特起自於服廬使習知於政務暫  
涖京畿之任旋升端揆之司嘗竊省修已多忝越乃復嗣位承華

之重正名貳極之崇瑤牒寶章奉徽儀而增惕龍樓雜戟撫蕞質  
以奚勝茲蓋云爲宗社無疆之計惟古今大義之公既惇貴貴之  
風仍厚親親之愛憶中宮於已往悼主鬯之方虛念臣乃昭德之  
遺孫憐臣實宣孝之嫡子遂曲垂於茲眷俾得冒於殊榮臣敢不  
恆自恪勤益深勸勵惟師善事惟邇正人學禮讀書慕聖賢之篤  
行問安視膳率忠孝之良規

大金集禮

立裴滿氏爲皇后謝表

天眷元年

悼平皇后

龍袞珠旒端臨雲陛玉書金璽榮昇椒房恭受以還凌兢罔措恭  
惟道兼天覆明並日升誠意正心基周王之風化制禮作樂煥堯  
帝之文章俯矜奉事之勞飭遣光華之使温言獎飾美號重仍顧  
拜命之甚優慙省躬而莫稱謹當恪遵睿訓益勵肅心庶幾婦道  
之修仰助人文之化

松漠紀聞

上太祖諡號表

天會三年

完顏杲

功與天同者非天不可以儷號德與地合者非地不足以齊稱昔



在三皇以同天之功而為喻降及五帝以合地之德而建名故功德克配於乾坤則稱號久光於竹帛仰惟先大聖皇帝撫興隆之運膺眷命之休奉天討以除殘運神謀而制勝曾不十載底定四方代虐以寬拯遼民於焚溺交鄰有道得宋國之服從豈非百代之閔休抑亦羣生之幸會方期定鼎遽泣遺弓皇帝陛下以同氣之親隆奉先之孝誕布聖武訖成代功茲垂烈於無期實肇基之有自敢上強名之號願新追冊之儀日月之光雖不容於繪畫海嶽之施庶以報於涓埃

大金集禮

賀俘宋主表

天會五年

完顏杲

伏觀破汴俘獲宋主者釁生鄰國宜我伐之用張佑自皇天果罪人之斯得照臨之下忭舞攸同竊以天棄宋邦運終趙氏為鄰數載取怒兩朝信則背先帝之恩遽渝海上之約桓則負吾皇之義又違城下之盟惟父子之罪同條故神人之心其棄既為吾愾詎訖厥誅王旅嘽嘽往專求於首惡虎臣矯矯思亟奏於膚功羽檄

旁飛神旗南指郡縣既下城壁俱摧前軍徑濟於黃河王氣潛消於赤縣堅甲利兵固資義勝高城深壘其如德何自知天網以難逃俱詣軍門而請罪望闕虔籲天之請在郊展銜璧之儀願上版圖乞為臣屬獲諸殷紂武王自誓於商郊繼彼秦嬰高祖親營於灞上未如聖代專委帥臣去年獲遼國之君遙聞捷報今日俘汴都之主佇聽降音不出戶庭克平海宇此蓋皇帝陛下神謀獨運廟算無遺甫逾載稔之間繼有非常之事告成先廟振不墜之英風傳報諸侯聳無疆之德勢六合之內罔不服千古以來未之有如臣等叨備宰司獲承聖略媿無裨贊徒幸遭逢元會在辰式集四方之賀愚誠歸美敢揚萬壽之休

賀俘宋主表

天會五年

宗翰

臣等奉詔伐宋屢克城邑繼至汴京閏月二十五日克汴三十日宋主趙桓出城今月二日率其諸王百官國人僧道望闕稽首跪上降表者稔惡弗悛自難逃於天網得道多助孰敢抗於王師惟



宋永八世之承平恃百年之儲積內有甲兵之備外無邊境之虞以其隔大海之遙未嘗通先朝之問太祖大聖皇帝誕膺歷數肇造邦家彼邦乃密修浮海之勤懇致復燕之請輒憑一介遂割兩京曾未立於歲時已遽忘於恩造動搖我封部招納我叛亡皇帝陛下以生靈為心擴乾坤之量但令理辨曲示含容迄無意於改圖方以師而問罪信則倉皇而遜位桓惟哀泣以求存議割三府之疆請復兩朝之好豈意我師甫退信誓又渝茲益重於前愆累再煩於天討蓋憑成算以底全功遂令繼世之君俱為亡國之虜威靈遐暢文軌大同臣等出分闡外之憂坐獲師中之吉躬齊五伐不勞仗鉞於商郊仰祝萬年願效捧觴於漢殿

再上世宗尊號表

大定五年

宗憲

函章屢貢宸聽未回雖聖心能以自儆在臣下有所未安夫簡在上帝之心謂之應天紹復先王之業謂之興祚仁以守位德以撫民無所不通非聖孰能與此先之以愛夫孝何以加乎道備至明

名非虛美臣等不勝大願謹固加上尊號曰應天興祚仁德聖孝至明皇帝

大金集禮

賀宋畫河請和表

天會五年

劉彥宗

我伐用張果獲師中之吉罪人斯得旋為道左之降凡預見聞孰不呼慶竊惟有宋昔謂殊鄰始馳一介而來請講兩朝之好推誠以待背德不恭乃父陰結於平山既渝海上之約厥子不割我三鎮又愆城下之盟迨惡貫之既盈蹈覆車而不戒聖算先定天兵載揚以蟻蟲蚊蚋之屯戰樞虎熊羆之士且天助者順人助者信既弗履行雖城非不高池非不深詎能固守彼眾狼狽而失據我軍奮躍以登陴夷門之火始然汴河之水皆沸臣主無捐軀之所社稷有累卵之危問使絡繹之求哀諸侯涕淚而拜叩申致畫河之請敢逃削地之誅且能修臣子之極恭惟所命令是用存朝廷之大體不即滅亡已昭討叛之形又著服柔之義金鼓一動威德兩全此蓋皇帝陛下旋乾轉坤開日闢月逍遙游息而廣土以定



拱揖指顧而大事聿成巍巍我功高冠百王之上煌煌國步獨尊  
六合之閒臣叨處鼎司出提兵柄逢千年之會徒其快於斯時奉  
萬年之觴恨阻陪於列辟

大金弔伐錄

加上世宗尊號表

大定十一年

李石

帝王之典莫大乎承天臣子之心不忘於歸美蓋至德答乾坤之  
既宜貴名增日月之光伏惟云丕釐耿命廣闢皇圖寅畏嚴恭簡  
帝心而上應高明光大繩祖武以勃興守位曰仁爲政以德聖心  
通物之微隱孝治廣民之儀刑迄用康年惟時懋敬憲唐虞之稽  
古監夏殷以從周由用天休肇稱郊祀祖廟社稷罔不肅祇羣神  
山川於茲望秩斷自緝熙之學敷爲經緯之章至若江淮來同海  
隅肆靖西旅之陪臣跋扈詔始問而卽誅朔幽之羣醜逋逃兵一  
臨而得雋暴禁亂止眾和民安四方無虞諸福畢至功德若茲民  
臣何報惟有對揚於鉅典庶幾推謝於鴻恩臣等以爲禮無不敬  
之謂欽經緯天地之謂文所覆者大之謂廣保大定功之謂武臣

等不勝至願謹加上尊號曰應天興祚欽文廣武仁德聖孝皇帝

大金集禮

加上世宗尊號第二表

大定十一年

李石

天因人而進順人卽天亦弗違名者實之賓有實則名其可已茲  
者羣情之歸美以其偉節之無前抑而未從悚然失措夫正心而  
誠意修己以安人至於出入起居罔不嚴恭寅畏謹四時而致孝  
享敬五事而承天心此欽之實也仁義立廉恥張禮樂明法度著  
建中和而爲皇極求儒雅而闡大猷以來遠人以洽四國此文之  
實也富有之謂大業德容以受丕基恢然如乾道之包涵博哉如  
乾元之持載無此疆與爾界皆一視而同仁此廣之實也授神略  
以折遐衝稽長道而屈羣醜陟威懷之禹跡小綏定之唐功七德  
頌乎止戈一戎昭乎除亂此武之實也實旣如此名宜謂何伏望  
聖慈從人之願

大金集禮

加上世宗尊號第三表

大定十一年

李石



南郊迎至以報天惟國家之熙事聖人備道而全美屬臣子之揚  
休從古已然故實且在伏望少忘沖挹俯賜矜從高拱穆清不受  
典冊答神祇之靈貺協臣庶之歡心 大金集禮

賀追尊皇考妣禮成表 天會十三年

聖子神孫膺期邇駿烈考文母正名垂鴻為帝者之大榮宜臣哉  
之胥慶伏惟睿蘊生知愛敦終慕駒馳過隙嗟日月之不我留龍  
飛在天視富貴之無以樂欲報之德不忘於心故能尊其所尊可  
謂孝乎惟孝爰遵舊典仰奉徽稱亦既追王宜載隆於異數本為  
繼祖非謂顧其私親葬循周武以肆遷事比漢宣而更異駿奔清  
廟贊大禮以告成鷺集冊庭對宏休而歸美 大金集禮

請受尊號禮冊表 大定六年

頃奉制書誕揚徽號未崇冊典實鬱輿情今已四方無虞百工允  
治節令調而五穀稔盜賊息而兆民安咸謂天下適當斯且伏願  
俯從忠悃昭受丕儀 大金集禮

奉安三聖御容羣臣賀表 大定十九年

三后在天神遊雖邈一人忠孝廟寢是崇既新寶冊之成載肅真  
儀之奉涓辰遷宇浹宇均歡中祇遙先猷緝熙茂集言念武元之  
成烈蓋遵聖肅之貽謀太宗守以文睿考嗣其德慨瞻遺像增大  
原祠聳層觀之巍巍規模具麗仰眸容之穆穆精爽如存臣陪侍  
親祠獲觀緡禮孝悌之至遂能通諸神明祖考以安於是成其福  
祿 大金集禮

立原王為皇太孫羣臣賀表 大定二十六年

璿宮敷佑夙開甲觀之祥寶冊正名爰定春宮之位云云載舉升儲  
之典式昭繼體之光肆嚴奉於宗祧保永安於社稷是謂立國家  
之本有以格神祇之歡少海分流接瀛波而增潤前星續耀拱帝  
座以常明和氣周被於九區厚福延及於羣品臣等欣逢聖運幸  
觀曠儀基緒有輝仰重離之協吉馘穀來備慶萬壽之無疆 大金

集禮以上原列卷十二



金文最卷六

金文最卷七目錄

謝帶笏表 見文雅

上章宗尊號表

上章宗皇帝實錄表

禘禮慶成表

賀立皇太子表

統軍謝免罪表

平章謝撫諭表

車駕幸慶甯宮皇妃起居表

車駕幸慶甯宮皇妃起居表

百官起居表

賀閏月表

樞密左丞授平章政事表

王寂

趙秉文

趙秉文

趙秉文

趙秉文

趙秉文

趙秉文

趙秉文

趙秉文

趙秉文

趙秉文



平章授左副元帥謝表 趙秉文  
賜宣慰夫人葬賻贈龍腦水銀錦段謝表 趙秉文  
平章左副元帥謝宣諭賜馬鉸具兔鶻匹緞藥物表 趙秉文

謝宣諭生擒賊將田俊邁表 趙秉文  
謝宣諭破壽蔡州賊賜玉靶劍玉荷蓮盞一隻金一百兩內 趙秉文  
府緞一疋表 見文雅

丞相謝過表 趙秉文

平章乞致仕表 趙秉文

左參政乞致仕表 見文雅

宰相為蝗生乞罪表 趙秉文

擬賀登寶位表 正大元年奉都堂鈞旨作

擬御史大夫讓樞密使表 正大元年奉都堂鈞旨作

元好問

遼主降表

遼主謝免罪表

遼主謝封海濱王表

宋主降表

宋主降表 係令改定

昏德公謝賜婚內族表 天會七年

昏德公謝賜幣帛酒果及許諸女相見表

昏德公奏赴鶻里改路安置表

重昏侯謝賜幣帛酒果及許諸女相見表

宋國誓表 皇統二年

夏國誓表 天會二年

夏國賀正表

高麗稱臣表 天會四年

高麗謝宣諭表

恭孝王  
恭孝王



高麗賀平宋表 天會五年

高麗誓表 天會七年

高麗謝還送金鐵衣崔頗喜及馬匹表 天會七年

高麗請免追索保州投入人口表 天會八年

高麗賀正表 大定十一年

高麗請以弟皓權守軍國表 大定十一年

高麗奏權守軍國表 承安三年

高麗請以弟暉權守軍國表 承安三年

高麗奏權守軍國表 崇慶十年

渤海賀正表

降表

封曹王謝表 以上原列卷十四

恭孝王

恭孝王

恭孝王

恭孝王

莊孝王

光孝王

光孝王

靖孝王

元孝王

郭藥師

劉豫

金文最卷七

表

昭文張金吾月霄輯

上章宗尊號表

趙秉文

率籲眾願祇薦鴻名奉綸命以未俞慮精誠之未至輒申前懇仰  
瀆宸嚴伏冀矜從以期得請臣聞乾坤之量無得而形容日月之  
光不勞於繪畫其有功參化育理謝名言應帝王之迹蓋出強名  
殫臣子之誠又烏可已欽惟皇帝陛下天資英粹聖學緝熙宣列  
聖之重光席太平之休運文物煥乎三代聲教浹乎八荒爰自卽  
位以來專以愛民為務置常平以備水旱遣信使以勸農桑三讞  
之外而尚慮囚徒萬機之餘則親覽章奏減樂府出宮女定律令  
正禮儀闢儒館以崇文繪功臣而厲武恢土德以大中原之統繚  
塞垣以杜外夷之虞所為經略萬方彌綸百度大功非止於數十  
聖德未究其毫釐是以德澤之流霧靄雲蒸瑞應之至山湧水出



神鳳翔於磁郡寶鼎出於汾陰年穀屢登邊鄙不聳時雨赴感瑞雪應期天人之際已交上下之望咸塞由是勳戚庶政文武具僚緇素之流耆艾之屬其願薦鴻稱者以億計而久曠大典者踰十年尚虞庶政之闕遺復慮榮名之侈及夫稽政道不若察眾望守謙德不若建大中況此皇王之上儀祖宗之故事闕上儀而不舉皇上將有愧於前遵定制之已行祖宗亦有望於後使典禮而未備豈臣鄰之敢安若夫淵懿冠倫有密基命發育萬物裁成兩間所以繼於天儲思穆清游以昭曠宥爾神略巍乎帝功所以法於道澤昭天泉恩及麋卵博施濟眾視民如傷茲不曰仁乎雲漢天章金玉王度藻飾萬物轆轤三光茲不曰文乎賞不閒於賤疎罰不阿於貴近其理財也取之有制其御戎也動而有經茲不曰義乎不怒而威不殺而服天戈所指則凶渠授首皇威所震則夷齊請臣茲不曰武乎窮理盡性無方可測謂之神極深研幾無所不通謂之聖至明以照乎萬里之外大孝以甯乎七廟之神臣謹上

稽天心下察眾志謹與文武百僚懇懇懇不勝大願固請上尊號云云伏望陛下曲回淵聽俯察輿情爰及陽春昭受顯號命禮官而諏日詔儒者以刺經參二帝以為三襲六經而為七編金刻玉坐膺備物之儀拊石鳴鐘大講中天之禮四方來賀萬壽無疆臣無任云云

上章宗皇帝實錄表

趙秉文

臣秉文等言伏以唐虞之際有典謨彰洪烈文武之政在方策迄為顯王自昔人君必存史籍既有其豐隆顯懿之德亦賴夫溫醇深潤之文鋪張對天之洪休揚厲光前之偉蹟然後事辭不苟聲實相當伏以章宗皇帝聖敬日躋聰明時乂光膺大業祇述先猷稟大有為之資千古挺出行不忍人之政葦年有成發廩粟以賑貧窮置外臺以審刑獄罷征斂於即日減租稅者累年敦勸農桑裁定制度孝承祖廟款謁天壇秩曠古之無文定國朝之大禮生徒徧學校冠蓋環橋門煥乎之文足以藻飾百度赫然之怒足



以震疊萬方始以殷高之明鬼方肆伐終然宣后之烈淮夷來舒  
故得孽宋增幣以乞盟阻鞮革心而效順西服銀夏東撫辰韓歲  
時相望琛寶入貢由是蒸為瑞氣散為祥風神鳳來翔寶鼎出現  
野蠶成繭嘉穀旅生至於奎璧之文河洛之畫日月出矣光其不  
亦難乎江漢濯之皜乎不可尚已尚卻徽稱而不受愈彰聖德之  
難名二十年閒鼓舞太和之治億萬世後光華惇史之書況夫良  
將之遠籌賢相之婉畫所表忠臣節婦所舉異行茂才本兵輿賦  
之煩生齒版圖之數所宜具載以示方來欽惟皇帝陛下夤紹燕  
謀思光前烈謂信書之未畢恐遺美之不昭深詔儒臣詳為實錄  
往在東海之際已抽中秘之書踵此編年俾之載筆屬典策之未  
上值敵寇之不虞師旅繹騷篇帙散逸欽承聖訓復命編摩徧閱  
官滕曲加搜訪然而起居注有所未備行止錄有所未詳或摭摭  
於案牘之餘或採拾於見聞之際載之行事誠咸五以登三及此  
成書懼挂一而漏萬臣等所編成章宗皇帝實錄一百卷并事目

二十卷總計一百二十卷繕寫了畢謹具進呈狀伏望聖慈曲垂  
省覽臣文章學術空疎遺美不彰雖乏三長之妙直辭無愧  
庶伸一得之愚

涇水集

禘禮慶成表

趙秉文

親祀祖廟有嚴禋獻之儀上順天陽益定尊卑之義禮行一日風  
動四方欽惟御眾以寬奉先思孝吉蠲近日款謁大宮戒嚴之際  
則風雨順從將事之夜則月星朗祖考昭假福祿來宜惟熙事  
之備成實太平之高致臣預瞻隆禮祇侍齋祠神其格思昭一人  
之有慶君曰卜爾酢萬壽之無疆

涇水集

賀立皇太子表

趙秉文

繼體承祧尤重元良之寄立嫡以長式符公器之歸華夏宅心天  
人同慶欽惟茂隆聖德誕受丕基深維永圖早定大本重明麗正  
繼照則蓋取諸離一索得男主器者故受之震上以隆廟社無疆  
之福下以係臣民咸戴之恩羽翼已成豈藉商山之皓謳歌攸屬



益知子啟之賢臣等久沐天恩預聞國慶雞鳴問寢慶歌三善之  
休虎拜颺言仰祝萬年之壽

溢水集

統軍謝免罪表

趙秉文

誤軍期者無赦邦有常刑忘人罪而責成君之大德已捐前肯仍  
玷新恩中謝臣聞王者使臣功不如過人臣報國死不如生要之  
能至於成功可以贏償於宿負一昨臣分屯西道俾扞北陲麤置  
營屯稍增塹壘皆本授之成算固無取於瑣才朝廷察臣小心寄  
臣大任委之以精兵之地授之以專對之權庶知敵情預為邊備  
而臣才微責重識暗慮輕誘未識於楚羸敵妄言於邾小遂闕儲  
胥之備尚遺宵旰之憂大則置之典刑小則削其仕籍國曰可殺  
臣猶自知豈意隆恩曲全微命枯骨復肉寄面何顏尚且慮臣以  
輕敵損威憫臣以積憂致斃謂臣智雖失料心則無他盡棄前瑕  
許圖後效激昂有地奮躍呼天此蓋伏遇皇帝陛下燭物以明及  
人以德忘曹沫三敗之辱要孟明一戰之功遂致罪囚復塵任使

臣敢不洗心知悔畢志改圖再三經畫之籌庶裨帷幄萬一生成  
之賜少答乾坤不勝激切之至

溢水集

平章謝撫諭表

趙秉文

外虞肆靖方深重慎之懷中使俯臨俄示撫存之渥人微任重寵  
與愧并如臣者素乏壯猷濫膺闕寄才雖無取心則靡皇欽惟皇  
帝陛下內恕及人至明燭物憫河南之積暑知臣下之微勞臣敢  
不益勵懦衷仰酬睿澤王事靡盬敢懷蒸溽之憂天威所臨即遂  
凱還之樂

溢水集

車駕幸慶甯宮皇妣起居表

趙秉文

八月其獲適當講事之秋三歲乃巡尤見重民之意動惟時順樂  
與時同欽惟深略偉文睿謀經遠修己以安百姓正家而御萬邦  
王業所基必本關雎之化朝廷既治乃講騶虞之田妾等留侍掖  
廷阻趨行闕女工載績望虞舜之裳衣聖壽無疆期周王之福祿

溢水集



車駕幸慶甯宮皇妃起居表

趙秉文

正時以閏方欣萬寶之成出狩於田猶俟三農之隙豫順以動益  
悅無疆欽惟皇帝陛下乾坤其仁金玉其慶駕言出狩車旣攻而  
馬旣同無已太康民不勞而國不費屬秋霜之戒候與聖體以御  
宜妾等留侍中閨阻朝外闕羽旄有美想聞百姓之歡弓鞬興祥  
更上多男之祝

滏水集

百官起居表

趙秉文

民狎於野方農務之告成時邁其邦象天威而講武翠華所駐和  
氣交形欽惟駿惠先猷動遵古制俎豆舉三驅之禮羽旄形百姓  
之歡豈徒獲赤雁以作歌薦之郊廟庶幾得飛熊而應卜福夫邦  
家臣等祇奉綸言叨釐省務賡汾水秋風之作阻預羣官頌南山  
天保之詩願言萬壽

滏水集

賀閏月表

趙秉文

五年再閏雖云王者之居門一歲三田皆於農隙以講事禮昭大

統歡溢綿區欽惟適奢儉之中參文武之用交物有則視民如傷  
世已治而戒事之無虞歲已登而慮民之不給猶謹治兵之教載  
爲省斂之行飲是太和錫之純嘏臣等祇膺綸命留玷中臺卽雲  
氣以望蓬萊一心徒切祝泰元之授神筴萬壽無疆

滏水集

樞密左丞授平章政事表

趙秉文

陳力不能方虞罪責捫心何有遽及寵光聞命若驚以榮爲懼  
謝臣伏聞典冊所載謂天官不可假人祖宗以來示宰相不皆用  
舊或以內親於百姓而外撫於四夷有非其人不可付以事如臣者  
斗筭小器樗櫟散材偶塵科第之微遂忝縉紳之列亦嘗參中書  
之政叨左轄之司徒累明恩無補國論天實鑒此臣猶知之偶邊  
隅少警之初乃臣子効節之日當先行列況忝丞疑左右樞省者  
四年來往東西之兩地賴神謀之經略底外裔之服降敢叨天功  
以私臣力伏惟陛下憫臣以簪履之舊矜人以犬馬之勞謂雖無  
術以補天或可因人而成事綸言下逮中使俯臨官超四階爵躋



一品人微寵厚祿重身輕欲上章引避則慮瀆聽聞欲奉命馳驅則實懷慚懼臣之進退交集兢惶意明聖之遠圖以羈縻之新附欲壓以重臣之勢敢懷乎小己之私敢不益勵初心誓圖後効天威不遠實懷過厚之誠聖德難酬仰祝無疆之壽

溢水集

平章授左副元帥謝表

趙秉文

歌六月飭戎車利執言於醜虜作三軍謀元帥誤置貳於庸虛聞命若驚撫心知愧中謝臣聞兵應者勝豈得已而後興師出無名彼不亡而何待過勞聖慮臨遣將臣如臣者朴以少文懦而不武雖幸平鼠竊之寇而愧匪鷹揚之材奉命以來以榮為懼然士氣已吞於吳會而天誅未即於淮夷敢意兵符重忝聞寄此蓋伏遇皇帝陛下功超將將道顯威威任事而必以誠與人而不求備授之成算折此遐衝遂致非才亦叨重責仍且頒金而佐費錫藥以扶衰臣敢不佩賜孔懷味珍知戒享士廣分甘之惠勞師體止渴之仁是以似之敢後西平之子不遑甯止尚寬南顧之憂

溢水集

賜宣慰夫人葬贈龍腦水銀錦段謝表

趙秉文

伏以義不顧私既鑿凶門而出恩猶逮室更迂卹典之華死況於生感深以泣中謝伏以君父之託受服啟行伉儷之恩從宜可貶方深國慮何以家為臣素乏將才叨承闕寄寵踰其分釁鍾厥家仰累明恩俾光私室錫龍水以為葬斂之具飾錦綺以為贈贈之資數極哀榮恩深窀穸此蓋伏遇皇帝陛下冠冕至德體貌羣臣施恩於既往之魂垂德於不報之所遂令朽骨亦玷餘榮兒姪至於誓心犬馬猶知懷惠歿而有識應結草以知歸生者可知至蓋棺而後已一心莫展萬壽無疆

溢水集

平章左副元帥謝宣諭賜馬鉸具兔鶻匹緞藥物表

趙秉文

小醜亂常致干天討偏師壓境屢奏膚功豈料庸疎猥承褒寵中謝伏以薄伐荆楚鋪敦淮瀆來旬來宣增六軍之氣不留不處成三務之功以至提虎旅之三千破島夷之數萬孤城擒布異域獲



嘉敢叨天功以爲臣力此蓋伏遇皇帝陛下仁心惻但詔旨溫淳  
癡老爲之聳觀武夫至於感泣人百其勇士一乃心縱其前禽執  
此醜虜捷無虛日賞不踰時撫戰士之勤勞優將臣之寵錫遂令  
眷渥曲被微躬佩刀非斷割之才解帶乏羈縻之術徒復驅馳聖  
策衣被天光奉命靡皇味珍知愧臣敢不據鞍忘老執轡請行載  
惟筐篚之恩莫非臣民尙謹藥石之戒恐累主知不矜小捷之易  
成庶獲大功而圖報

滄水集

謝宣諭生擒賊將田俊邁表

趙秉文

凶渠生致頓收一戰之功中使俯臨過沐九重之諭寵光曲被感  
愧交并中謝臣聞周王歌六月之師殷高美三年之克豈有偏將  
成師而出醜虜望風而奔捷以至三一皆當百雖未馘孫權之首  
已能俘孟獲之降從古罕聞於今爲烈此皆一人授算諸將協心  
謀不遺長臣於何有欽惟皇帝陛下沈幾獨運羣策兼收慮小器  
之易盈戒成功之難保臣敢不銘心聖訓畢至事機草木知威已

振先聲之氣蜂蠆有毒更深慮勝之懷

滄水集

丞相謝過表

趙秉文

怪神不語諒天道之匪謔信僞難明亦人言之可察咎將誰執臣  
猶自知中謝伏以申觀儲祥甘泉錫慶茲爲社稷之大計豈朦臣  
子之至情而臣等易動浮言輒爲膚奏庶幾崑崙之賤或叶唐兒  
之微豈謂以憑虛之言冀無妄之福罪之大者天可欺乎欽惟陛  
下開日月之明廓乾坤之德謂臣過在輕信察臣心則匪他赦其  
智識之不明復以訓辭而諄諭臣敢不洗心加厲捫舌知非報國  
無功但抑譎張之患事君有義益堅畏慎之誠

滄水集

平章乞致仕表

趙秉文

恩厚身輕莫有涓埃之報效力微任重豈逃天地之鑒臨恐貽覆  
餗之差輒有避賢之請中謝臣聞忠臣不敢受無功之賞明君不  
能畜無用之臣然後朝議俞諧天工無曠如臣者斗筭小器樗櫟  
散材早際休明偶塵任使適邊隅之少警備行列以居前仰賴聖



慈苟逃罪責既委之要衝而獨當一面復預於帥閫而總統諸軍屬聖主之嗣圖尙賊臣之稽戮但知除君側之惡不敢避天威之誅豈意罪不汝瑕寵踰所望猥進貳樞之重與聞政事之煩內無張華經國之謀外無營平破賊之計在承平之日不敢冒居況多難之時豈能有補加以門膺世爵子尙主姻在君恩更何以加而臣才僅止於此豈微軀之敢愛慮賢路之久妨伏望皇帝陛下廓日月之明回雨露之施別求俊異俾就退閑使臣無居寵之嫌得安常分而國有得賢之助早致太平

滏水集

宰相爲蝗生乞罪表

趙秉文

陰陽佐理濫居丞弼之司蝗旱爲災深負變調之責兢惶失措踧踏靡安伏念臣等以斗筭之材膺棟梁之任外不能鎮四夷而撫百姓內不能調元氣而率羣臣徒累明恩叨承重寄以致旱暵爲虐貽當亡之憂螟蟻繼生爲下民之害歲一不熟罪將安歸方聖主建中興之功而臣等蹈素餐之責位苟冒處人其謂何伏願皇

帝陛下憫臣以無功而自慚察臣以有罪而自劾別求俊異許就退閑庶可下弭謗言上消沴氣則知天工之不曠亦足爲榮但令賢路以無妨猶云有補

滏水集

擬賀登寶位表

正大元年奉都堂鈞旨作

元好問

中國之有至仁無思不服聖人之得大寶咸與維新凡在照臨舉深慶并中謝竊以社稷隆神器之重父子處人倫之先付與既公眾庶斯定我國家光宅天下丕冒海隅世祚承平古無倫擬先皇帝總持權柄宏濟艱難安強成道德之威信順得天人之助大功甫集明命有歸欽惟皇帝陛下孝弟通於神明忠厚及於草木聖神文武克享皇天之心獄訟謳歌皆曰吾君之子百年享國初得正傳三后在天更無遺恨大定明昌之治增重宜及於此時周宣夏后之功專美豈容於他日風雲嘉會日月中興臣等夙被生成重叨際會接千歲之統既欣歷數之有歸上萬年之觴行慶版圖之盡復

遺山集



慈苟逃罪責既委之要衝而獨當一面復預於帥閫而總統諸軍屬聖主之嗣圖尙賊臣之稽戮但知除君側之惡不敢避天威之誅豈意罪不汝瑕寵踰所望猥進貳樞之重與聞政事之煩內無張華經國之謀外無營平破賊之計在承平之日不敢冒居況多難之時豈能有補加以門膺世爵子尙主姻在君恩更何以加而臣才僅止於此豈微軀之敢愛慮賢路之久妨伏望皇帝陛下廓日月之明回雨露之施別求俊異俾就退閒使臣無居寵之嫌得安常分而國有得賢之助早致太平

滏水集

宰相爲蝗生乞罪表

趙秉文

陰陽佐理濫居丞弼之司蝗旱爲災深負變調之責兢惶失措踧踏靡安伏念臣等以斗筭之材膺棟梁之任外不能鎮四夷而撫百姓內不能調元氣而率羣臣徒累明恩叨承重寄以致旱暵爲虐貽當亡之憂螟螣繼生爲下民之害歲一不熟罪將安歸方聖主建中興之功而臣等蹈素餐之責位苟冒處人其謂何伏願皇

帝陛下憫臣以無功而自慚察臣以有罪而自劾別求俊異許就退閑庶可下弭謗言上消沴氣則知天工之不曠亦足爲榮但令賢路以無妨猶云有補

滏水集

擬賀登寶位表

正大元年奉都堂鈞旨作

元好問

中國之有至仁無思不服聖人之得大寶咸與維新凡在照臨舉深慶抃中謝竊以社稷隆神器之重父子處人倫之先付與既公眾庶斯定我國家光宅天下不冒海隅世祚承平古無倫擬先皇帝總持權柄宏濟艱難安強成道德之威信順得天人之助大功甫集明命有歸欽惟皇帝陛下孝弟通於神明忠厚及於草木聖神文武克享皇天之心獄訟謳歌皆曰吾君之子百年享國初得正傳三后在天更無遺恨大定明昌之治增重宜及於此時周宣夏后之功專美豈容於他日風雲嘉會日月中興臣等夙被生成重叨際會接千歲之統既欣歷數之有歸上萬年之觴行慶版圖之盡復

遺山集



擬御史大夫讓樞密使表

正大元年奉都堂鈞旨作

元好問

憲府備員積有妨賢之畏樞庭謀帥遠膺制勝之求拊陋質以何  
 堪對寵光而知懼中謝臣聞受祿過量忠臣恥其素餐因能任官  
 明主不以私授蓋物勝於權則衡為之殆馬竭其力則御速於顛  
 臣雖至愚敢忘斯義伏念臣智靈弗競器蘊尤疎初無落落過人  
 之才徒有區區自信之志薦更中外無補事功竊憂大譴之方來  
 敢謂異恩之橫被而況樞極通帝位之紀宥府嚴師律之謀周設  
 六官司馬聯於冢宰漢分三府太尉列於中台故必文武智能之  
 臣乃付腹心爪牙之任人歌宣后豈無吉甫之憲邦天啟高皇宜  
 得留侯而籌幄顧以菲才而叨據在於公議而謂何伏望皇帝陛  
 下大道曲全至明博照察臣心之有愧憫臣力之弗勝追還誤恩  
 妙簡良輔退而勞力足昭名器之至公因是得人旋致朝廷之增  
 重遺山集

以上原列卷十三

遼主降表

臣耶律延禧言今月十八日西南西北兩路都統府差蕭愈等賫  
 到文字該准奉詔旨招諭者伏念臣祖宗開先順天人而建業子  
 孫傳嗣預功德以守成家有天運權持正統拓土周數萬里享國  
 餘二百年從古以來未之或有迨臣纂紹即以云為恃太平既久  
 之時曠累代常行之法寢行侮易先忤交和輒無名以行兵望有  
 捷而張勢曲直既顯勝負自分雖黷武之再三曾敗績之非一往  
 馳信使永講前歡特蒙天地之恩許結弟兄之睦臣更為眩惑弗  
 克遵依以是再引戈矛重尋釁隙民神共怒智力俱窮寶命既歸  
 神器難守宗廟傾覆甘承去國之羞骨肉見俘獨作逃生之虜非  
 天時之未識緣已罪之尤深宣諭幸聞宸恩得浹臣自知咎惡猶  
 積兢惶伏念皇帝陛下念上世之舊歡恕愚臣之前過許奉先人  
 之祀留為亡國之餘則百姓蒙再造之恩一族感聚居之義謹與  
 見在從官望闕俟罪大金集禮



金吾案北盟會編引亡遼遺錄載天祥降表與此迥異附錄於後

遼國降臣耶律延禧謹伏斧鉞躬詣大金國俯伏待罪臣聞人不患其勇患其為暴也伏念臣祖宗創二百年之基承天統位繼子傳孫郊祀上帝內外權慶豈意微臣骨寒命薄無德可褒不能當此夙夜惶駭罔知過咎冒犯忌諱若曉霜而遇烈日扁舟而遭怒濤罪惡競興譖辭蜂起致茲慚德激揚聖怒轉加兵師憂驚之極如坐炭湯蓋聞枳道之放荷蒙記恤况若新安之歎例受無辜念漢皇之仁恩誕敷霈澤誦項羽之過惡奚免終傷臣所懇者乞諧枳道之留免效新安之禍戰慄之至仰干聰聽昧死謹言

遼主謝免罪表

臣延禧言四月八日賫到詔書一道特免臣罪及撫諭仍與西南西北兩路都統勃極烈同朝見者豈不自知合被罪盈之責將何以報特蒙望外之恩欣幸越常兢惶失次伏惟皇帝陛下仁洽萬物道配二儀猶推不忍之心靡追既往之咎溫頒天語秩振德音

俾底安全特寬罪戾非一身甚幸免武湯問罪之威抑舉族矜全荷唐虞好生之德今專俟都統字極赴闕同行次

遼主謝封海濱王表

臣延禧言今月七日伏蒙聖慈特賜詔書一道降封臣為海濱王者罪當不免誠天下之公言恩及有加見聖人之全度事來望外喜見憂中伏念臣粵自祖宗肇有社稷山河固國開數萬里之提封功德浹民享二百年之福祿迨臣繼統之後昧於守成之難矜得太平作為多罪先絕鄰好輒造釁端遂出無名之師果為有德者勝未更十載併失五都左右以之離心中外以之解體漸及窘迫旋至播遷命寶以歸神器安在朝夕莫保骨肉見離伶俜一身淒苦萬狀昔兵連怨結幾年忤先帝之心今勢盡力窮何能逃吾君之手伏承皇帝陛下具遺旨明諭聖言許臣不死之恩恕臣既往之咎故當道聽是即歸懷今則先廟告成中宸賜見凌兢失魄慚汗何顏即加斧鉞之誅正為當罪如投魑魅之處非不甘心



豈期遽易刑章曲從禮典所幸得全性命敢希天上之恩何期不  
伍公侯更賜日中之號此蓋皇帝陛下大明徧照至德兼容取亂  
侮亡仗殷周之義繼絕興滅推唐虞之仁以致此身得承先祀倘  
九廟之靈不昧潛亦知恩況百口之屬更生何忘報德  
大金甲伐

宋主降表

臣桓言伏以今月二十五日大兵登城出郊謝罪者長驅萬里遠  
勤問罪之師全庇一宗仰戴隆寬之德感深念咎俯極危衷臣誠  
惶誠懼頓首頓首猥以眇躬奉承大統惜不更事濟以學非昧於  
知人動成過舉重煩元帥來攻陋邦三里之城已失藩籬之守九  
廟之祀當成煨燼之餘不圖深仁曲假殘息茲蓋伏遇伯大金皇  
帝乾坤之德甚博日月之照無私不怒之威既追蹤於湯武好生  
之德且儷美於唐虞弗念一夫之辜特全萬人之命宇宙載肅宗  
社獲安文軌既同永託保存之惠雲天在望徒深嚮往之誠無任

瞻天望聖激切屏營之至奉表稱謝以聞臣桓誠惶誠懼頓首頓  
首謹言天會四年十二月 日 大金甲伐錄

宋主降表 係令改定

臣桓言背恩致討遠煩汗馬之勞請命求哀敢廢牽羊之禮仰祈  
蠲貸俯切凌兢臣桓誠惶誠懼頓首頓首竊以契丹為鄰爰構百  
年之好大金闢國更圖萬世之歡航使旌絕海嶠之遙求故地割  
燕雲之境太祖大聖皇帝特垂大造許復舊疆未閱歲時已渝信  
誓方獲版圖於析木遠連陰賊於平山結構大臣邀回戶口雖違  
恩義尚貸罪愆但追索其人民猶夸大其土地致煩帥府遠抵都  
畿上皇引咎以播遷微臣因時而授禪懼孤城之失守割三府以  
求和屢致哀鳴亟蒙矜許官軍纔退信誓又渝密諭土人堅守不  
下分遣兵將救援為名復構結於使人見包藏之異意遂勞再伐  
並興問罪之師又議畫河實作疑兵之計果難逃於英察卒自取  
於交攻尚復嬰城豈非拒命怒極將士齊登三里之城禍延祖宗



將隳七廟之祀已蠲銜璧之舉更叨受館之恩自知獲罪之深敢  
有求生之理伏惟皇帝陛下誕膺駿命紹履鴻圖不殺之仁既追  
蹤於湯武好生之德終儷美於唐虞所望惠顧大聖肇造之恩庶  
以保全弊宋不絕之緒雖死無辜受賜亦多道里且修莫致籲天  
之請精誠所格徒深就日之思謹與叔燕王僕越王偲弟鄆王楷  
景王杞祁王模莘王植徐王棣沂王禔和王棡及宰相百僚舉國  
士民僧道耆壽軍人奉表出郊望闕待罪以聞臣誠惶誠懼頓首  
頓首謹言天會四年十二月 日大宋皇帝臣趙桓上表 大金弔

昏德公謝賜婚內族表 天會七年

臣佶伏奉宣命召臣女六人賜內族為婦具表稱謝伏蒙聖恩賜  
敕書獎諭者仰勤睿眷曲念孤蹤察流寓之可憐俾宗藩之可託  
伏念臣棲遲一己黽勉四遷顧齒髮以俱衰指川途而正邈獲居  
內地罔聞流言得攀若木之枝少慰桑榆之景此蓋伏遇皇帝陛

下擴二儀之量孚羣有之私因獨夫所守於偷安辨眾情免涉於  
疑似臣敢不誓堅晚節力報深恩儻伏臘稍至於蕭條賴葭莩必  
濟乎窘乏尚祈鴻造俯鑒丹衷臣無任瞻天望聖激切屏營之至  
大金弔伐錄

昏德公謝賜幣帛酒果及許諸女相見表

天恩下逮已失秋風之寒父子相歡頓覺春光之煖遽沐絲綸之  
厚仍蒙縑縹之頒感涕何言驚惶無地竊以臣舉家萬指流寓三  
年每憂餬口之難忽有聯親之喜方虞季子之敝誰憐范叔之寒  
既冒寵榮愈加驚悸此蓋皇帝陛下唐仁及物舜孝臨人故此冥  
頑曲蒙保衛天階咫尺無緣一望於清光短艇飄颻自此面瞻於  
魏闕 大金弔伐錄

昏德公奏赴鵲里改路安置表

臣佶言伏蒙宣命差官館伴臣赴鵲里改路安置於今月二日到  
彼居住者曲照煩言止從近徙仍敦姻好尚賜深憐大造難酬撫



躬知幸竊念臣舉家萬指流寓連年自惟譴咎之深當務省躬之效神明可質詎敢及於匪圖天地無私遂得安於愚分驚濤千里顛躓百端幸復保於桑榆僅免葬於魚鱉此蓋伏遇皇帝陛下垂邱山之厚德擴日月之大明非風波而可移亦浸潤而不受回瞻象闕拜沃澤以馳心仰戴龍光感孤情而出涕

大金弔伐錄

重昏侯謝賜幣帛酒果及許諸女相見表

暫留內殿忽奉王言特許手足之相歡更被縑綈之厚賜喜驚交至恩旨非常伏念臣稟性冥頑賦資忠實負邱山之罪天意曲全聯瓜葛之親聖恩隆大方念無衣之卒歲遽欣挾纊之如春此蓋伏遇皇帝陛下內恕及人勞謙損己雖天地有無私之覆載而父母有至誠之愛憐念報德之何時懷此心而未已

大金弔伐錄

宋國誓表

皇統二年

臣構言今來畫疆合以淮水中流為界西有唐鄧州割屬上國自鄧州西四十里并南四十里為界屬鄧州其四十里外並西南盡

屬光化軍為敵邑沿邊州城既蒙恩造許備藩方世世子孫謹守臣節每年皇帝生辰并元旦遣使稱賀不絕歲貢銀絹二十五萬兩匹自壬戌年為首每春季差人般送至泗州交納自來流移在南之人經官陳說願自歸者更不禁止上國之於敵邑亦乞並用此約有渝此盟明神是殛墜命亡氏踣其國家臣今既進誓表伏望上國早降誓詔庶使敵邑永有憑焉

金史宗弼傳參宇文虛中

夏國誓表

天會二年

臣乾順言今月十五日西南西北兩路都統遣左諫議大夫王介儒等齎牒奉宣若夏國追悔前非捕送遼主立盟上表仍依遼國之制及賜誓詔將來或有不虞交相救援者臣與遼國世通姻契名係藩臣輒為援以啟端曾犯威而結讐既速違天之咎果罹敗績之憂蒙降德音以寬前罪仍賜土地用廣藩籬載惟舍垢之恩常切戴天之望自今以後凡於歲時朝賀貢進表章使人往復等



事一切永依臣事遼國舊例其契丹昏主今不在臣境至如奔竄  
到此不復存泊當即執獻若大朝知其所在以兵追捕無敢為地  
及依前援助其或徵兵即當依應至如殊方異域朝覲天關合經  
當國道路亦不阻節以上所敘數事臣誓固此誠傳嗣不絕苟或  
有渝天地鑒察神明殛之禍及子孫不克享國

金史

夏國賀正表

斗柄建寅當帝座更新之日葭灰飛管屬皇圖正始之辰四序推  
先一人履慶恭惟化流中外德被邇遐方熙律之載揚應令候而  
布惠克凝神於突奧務行政於要荒四表無虞羣黎至治爰鳳閣  
屆春之早協龍廷展賀之初百辟稱觴用盡輸誠之意萬邦薦祉  
克堅獻歲之心臣無任云云大使武功郎沒細好德副使宣德郎  
季膺等齋表詣闕以聞

松漠紀聞

高麗稱臣表

天會四年

恭孝王

大人垂統震耀四方異國入朝梯航萬里况接境之伊邇諒馳誠

之特勤伏惟天縱英明日新德業渙號一發羣黎無不悅隨威聲  
所加鄰敵莫能枝梧實帝王之高致宜天地之冥扶伏念臣瘠土  
小邦藐躬涼德聞非常之功烈久已極於傾虔惟不腆之苞苴所  
以伸於忠信雖愧蘋蘩之薦切期山藪之藏

高麗史

高麗謝宣諭表

恭孝王

高伯淑至密傳聖旨保州城池許屬高麗更不收復竊以句麗本  
地主彼遼山平壤舊墟限於鴨綠累經遷變逮我祖宗值北國之  
兼并侵三韓之分野雖講鄰好未歸故疆及乎天命維新聖王既  
作見兵師之起義致城堡之無人當臣父先王時有大遼邊臣沙  
乙何來傳皇帝敕旨曰保州本高麗地高麗收之可也先王於是  
理其城池實以民戶當此之時雖小邦未嘗臣屬上國而先帝特  
欲寵綏鄰藩霑以訓辭賜之舊土及後嗣之繼序適聖德之承天  
備認德音恭修臣職惟此東濱之寸土本為下國之邊陲雖嘗見  
奪於契丹謂已拜恩於先代特推異渥乃屬弊封豈僥倖而致茲



蓋遭遇之異甚深仁大義不可名言綿力薄材若為報效惟當備  
春秋之事守藝極之常舉邦國而樂輸傳子孫而永誓高明在上  
惻悞無他高麗史

高麗賀平宋表

天會五年

恭孝王

非常勝事不世異恩實千古之未聞舉一方面而祇服皇帝陛下應  
三靈之符讖襲累世之宗祧仁之所漸者深則義之所制者眾德  
之所施者廣則威之所屈者多故得神兵一揮率土大定東西南  
北拓地增疆華夏蠻夷望風束手功業光輝於竹素威靈聳動於  
乾坤今者飭使節以有宣與侯邦而同慶便蕃上眷渥縟多儀惠  
厚及遐固論酬而無計心存事大但忠盡以為期高麗史

高麗誓表

天會七年

恭孝王

使節賁來訓詞密諭俯儀聞命凌兢矢圖竊以周官司盟掌其盟  
約之法盟邦國之不協與萬民之犯命者而詛其不信而已至於  
衰季春秋之時列國交相猜疑不能必於誠信而惟盟誓之為先

故詩人譏其屢盟而夫子與其胥命伏惟皇帝陛下至德高於帝  
堯大信孚於天下光開一統奄有四方大邦震其威小邦懷其惠  
惟是小邑介在邊隅聞真人之作興先諸城而朝賀故得免防風  
之罪辱儀父之衰略諸細故待以殊禮錫之以邊鄙之地諭之以  
貢輸之式朝廷更無與於他故屬國敢有於異心而嚴命薦至敢  
不祇承謹當誓以君臣之義世傳藩屏之職忠信之心有如皦日  
苟或渝變神其殛之高麗史

高麗謝還送金鐵衣崔頗喜及馬匹表

天會七年

恭孝王

聖德方增大畏小懷而咸造龍光普被薄物細故而不遺臣聞費  
誓稱馬牛其風臣妾播逃勿敢越逐祇復之此雖諸侯之事然其  
言有諧於墳典其教不戾於帝王故編之乎聖人之書而次之於  
天子之命軌法萬世稱為六經伏遇皇帝陛下神明勃興威德兼  
備通達之屬莫不服從夷夏之民皆為臣妾矧惟下邑附近東隅



處國奉藩早盡畏天之禮推恩字小已蒙割地之仁况承皇使之  
移文更覺宸慈之浹物在邊境之未事尚不遺忘見朝廷之至仁  
務為寬厚顧惟孤寡何以勝堪瞻言咫尺之威第識拜命惟是春  
秋之事庶無後倫高麗史

高麗請免追索保州投入人口表天會八年 恭孝王

聞命以還精爽震越草芥之懇輒復剖陳神聖之慈冀賜矜察退  
惟踰僭愈切兢惶伏念臣蕞然薄材職是小國值真人之受命興  
大業以統天即慕義以入朝遂稱藩而修貢皇帝陛下仁深解網  
德厚包荒諒其面內之勤推之事小之會天會四年丙午九月日  
遣宣諭使高伯淑來傳詔旨亦有口宣保州城更不收復其投來  
人口亦令小國取便臣當時跼蹐下階拜受明命嘉與臣民懽忻  
感戴區區之心已兼表謝又天會六年戊申十二月日報諭使司  
古德韓昉來傳別錄保州之地初有詔諭更不收復意謂必能祇  
率舊章遵奉王室故朝廷不受其地特行頒賜爾後數歲尙未進

納誓表於理豈為穩便及自來脅從并逃移戶口其數頗多皆稱  
物故殆未可亮又昨來敕旨許賜保州並無一城境內語句兼未  
畫定界至自是見得係內地分宜約束封吏右上方數事爾國果能  
推誠享上即納誓表皎然自明朝廷亦當回賜誓詔兼別降指揮  
申畫封疆一切務從寬大成長久之計又韓昉移文館人曰朝廷  
方以大信示天下肯欺爾國臣受書言之明白感德意之殊尤指  
天誓心拜獻章表竊意宸慈俯賜誓詔而璽書薦至訓飭加嚴彷彿  
惶憂懼不知所圖况念人物投來之事是臣父先王未獲臣事上  
國時薄物細故而責之若此非乖小國慶賴之心亦恐非朝廷以  
至仁大德寵綏下藩之意此臣所以披肝瀝血干冒天威不能自  
止者也伏望皇帝陛下俯回明照深賜哀憐法先王綏遠之經用  
大漢釋逃之制特允至誠之請曲推全度之恩雖小陋以無能必  
激昂而論報葵藿之意向日以長傾江漢之流朝滄海而不息  
皇天后土鑒臣此言高麗史



高麗賀正表

帝出乎震方當遂三陽之生王次於春所以大一統之始覆疇之內  
內權慶皆均恭惟中孚應天大有得位所過者化閱眾甫以常新  
不怒而威觀庶邦之率服茂對佳辰之復備膺諸福之休臣幸邁  
昌期遠居外服上千萬歲壽會莫預於臚傳同億兆人心但竊深  
於善祝云云使朝散大夫衛尉少卿輕車都尉賜紫金袋李仲衍  
奉表稱賀以聞 松漢紀聞

高麗請以弟皓權守軍國表 大定十一年

莊孝王

臣今久纏疾恙漸致衰羸神靈以之皆荒氣力以之消沮醫攻熨  
而莫效藥瞑眩而不瘳豎居膏肓天奪魂魄以之祇服前人之訓  
言率先列國之貢藝而乃民政堆案而或廢於剖決國賓踵門而  
或失於將迎為邦之道既曠事主之儀多闕今則伏在牀枕幾委  
支體仰繁覆露之私深念播菑之業臣昔逮事臣父先國王嘗屬  
臣云苟有遞代必先弟及今臣有元子滋少而無慧長且多愆未

堪主鬯以展勤矧復奉藩而受職竊見弟皓忠順之德夙勤於君  
親恭睦之心無懈於朝夕載嘉淑行之如始益體理命之有徵乃  
於某月某日以臣弟臣皓權守軍國事務敢茲上聞冀照下懇 高麗史

高麗奏權守軍國表 大定十一年

光孝王

覆疇之仁靡私於一物聖神之德均視於萬邦恪布忱辭冒干洪  
造伏見臣兄國王臣覲久尊周室樂率漢藩緣感疾於中身遂抱  
羸於積稔十全不能措其手一丸豈復效其靈沈緜深頓仆是  
懼頃因脫釋於重負始欲保守於餘年蓋由承稟臣先國王臣楷  
遺屬以臣忝為同母之親可付先祊之業於某月某日令臣權守  
軍國事務而臣避之無計受亦誠難將籲呼以上聞顧跋涉之愈  
遠又黎庶不可以無主保釐不可以闕人勉副羣情假司分寄戰  
兢之抱莫敢違甯危慄之懷幾致隕越敢具事實以達宸嚴 高麗史



高麗請以弟暉權守軍國表

承安三年

光孝王

鶴鳴於九皋尚有可聞之響葵傾於日豈無委照之私敢憚懇款之誠仰瀆高明之鑒伏念某猥將緜力叨襲藩封表東海之濱久陶於聲教迫西山之日忽染於病疴一腳偏枯而行必借於人扶兩眼並昏而視不過於步內自年齡馴致若此非藥餌所可能為且當國政之堆前意必迷於去取如或皇華之臨境禮必缺於將迎念茲雖謂之小邦厥位難虛於一日顧父言之在耳須弟及而傳家故臣曩曾受付託於臣兄今宜畀重艱於臣弟況臣兄有元子臣某嘗傳聞於遺訓亦承順於臣心固謂太叔之賢非所跂及願附延陵之節固欲退藏而臣母弟暉德服人心名高戚里非特能保父於下國亦可藩宣於上朝乃於九月二十三日以弟暉權守軍國事務敢布腹心之微用祈覆載之惠

高麗史

承安三年

靖孝王

覆物無私帝王之至德仗信以事臣子之良規敢吐忱辭冒干聰

聽伏念舊邦遺裔荒服會臣遭逢解網之時涵泳垂衣之化伏見臣兄國王臣皓逮事先帝至於聖朝述職僅三十年禮無所失享壽餘六十載病莫能興藥乏萬金之哀病同二豎之苦欲釋重務庶保殘齡追述臣父國王楷遺囑以九月二十三日令臣權守軍國事務而臣迫此懇辭避將何計願負託之大重將呼籲以上聞然念宗廟不可以乏嗣黎元不可以無主勉從誠請假守繁機若臨淵而履冰或至隕越倘回霜而收電永荷生成區區之誠實天所鑒

高麗史

高麗奏權守軍國表

崇慶十年

元孝王

伏見國王讖早傳先業恪守外藩忽嬰疾病以彌留浸致形骸之甚弱攻療無狀顛仆是憂庶因脫釋於繁機姑欲保全於餘喘蓋由承稟臣仲父先國王臣暉遺囑以臣親則猶子理合承家如有遞更必先推與乃於前年十二月二十五日令臣權國事務而臣稟辭不獲已受亦難堪願付畀之非輕將籲呼而遙達然念黎元



不可一日而無主社不可曠時而乏嗣勉副羣情假司重器踞天踏地實深隕越之懷剖心折肝仰告端倪之實倘回淵聽深荷鴻恩

高麗史

渤海賀正表

三陽應律載肇於歲華萬歲稱觴欣逢於元會恭惟受天之祐如日之升布治惟新順夏時而謹始卜年方永邁周歷以垂休臣幸際明昌良深忭頌遠馳信幣用伸祝聖之誠仰冀清躬茂集履端之慶

松漠紀聞

降表

郭藥師

天會四年正月相時而動動止固未之有常順天者存存亡甯可以不察事屬已定人難執迷伏惟皇帝陛下祇奉先猷紹隆正統皇天所以假手而誅亂生民所以延頸而俟蘇臣等素提一旅之師旋屬百六之運自秦首之指伐洎文后之擅權政教皆失其紀綱恩威不行於咫尺十家欲叛者八九一日將死者再三在亡遼

無可事之君顧大金有難歸之路故率萬兵而附漢然嘗三載以撫燕宋主載嘉秦官是復祇念感一殮之惠尙思殞七尺之軀故窮捍禦之勞庶圖報答之效戰卒既寡餘力何施矧知上帝之是依敢思困獸之猶鬪豈一身之是惜念百姓之無辜頃者東徂雖曾雷震之敢犯今焉北去尙期天地之有容臣等謹以全燕文武官事將校并馬步甲兵十萬及係官斛粟錢帛諸物等謹陳表上進以聞

大金弔伐錄

封曹王謝表

劉豫

禮成大冊澤霈普天特列晉其封階不遐遺於舊物望闕拜命闔門感恩臣豫誠懼誠忭頓首頓首伏念臣昔仕季朝粗歷要官昧方枘圓鑿之理竭徒薪曲突之忠項氏將亡一范增而不用周家既勝致箕子之來歸試有微能爰升大位辭不獲已報將若何承積年殘毀有餘凡百事艱難已極闢寇賊以置朝市披荆棘而勸耕桑應機投隙以傾挫敵鋒損己便人以招集散徒忘寢忘食必



躬必親培廣業以惟勤庶大恩之不玷俄知廢罷之議愈堅措畫  
之心要先時成務於斯邦覬後日受知於上國至聞混一之意不  
待再三之言即隨使人往受宣命素所祇備復何遲疑百年辛苦  
以經營兩手懼怵而分付帝號若釋重負王爵尤感鴻恩自得清  
閑而北來未嘗徘徊而南望久安僻地忽被改封泊奉讀於訓詞  
若躬聽於御語温其如玉煖然自春星斗輝輝麗窈然之天道典  
謨渾渾顯大哉之王言徽軫爨下之焦桐青黃溝中之斷木光生  
懸罄之室榮長設羅之門茲蓋伏遇皇帝陛下德奉三無澤均九  
有敬識百辟之享獨觀萬化之原有功而必見知無罪而常善赦  
遂令窮悴得與褒嘉臣敢不守靖致虛安時處順何以效涓埃之  
報惟不為名器之羞北盟會編參大金弔伐錄以上原列卷十四

金文最卷七

金文最卷八目錄

奏疏

請削去明肅帝封號疏 大定二十二年

宣孝太子

諫索女直逃入高麗戶口疏 天會六年

見文雅

獄中上熙宗疏 天會十五年

完顏勗

諫割地與宋疏 天會二年

宗翰

劾伊爾必斯疏 興定二年

完顏伯嘉

請革弊政恤妄費疏 貞祐二年 見文雅

完顏素蘭

乞令有司舉堪任縣令者疏 貞祐四年

完顏素蘭

請慎選東宮官屬疏 貞祐四年

完顏素蘭

諫修見山亭疏 天興二年

完顏仲德

諫選室女疏 天興二年

完顏仲德

乞賜太醫使祁宰諡疏 泰和元年 見文雅

李秉鈞



論便宜疏

大定時

見文雅

曹望之

請立皇太孫疏

大定二十五年

見文雅

圖克坦魯

諫毀宋故都邱陵疏

鈕祜祿沒雅

再諫北幸疏

明昌四年

董師中

諫幸金蓮川疏

大定中

見文雅

梁襄

郊天配饗疏

大定十一年

見文雅

石琚

乞通上下之情疏

明昌元年

徒單鑑

論為政之術疏

承安五年

見文雅

徒單鑑

請肅禁築增諡號正風俗立綱紀戒妒忌嚴宮衛疏

熙宗時

程案

陳便宜十事疏

貞祐三年

見文雅

劉炳

請通檢貧富疏

承安二年

高汝礪

諫先與宋議和疏

興定元年

高汝礪

請減免河南添徵通寶疏

興定元年

高汝礪

諫權油疏

興定三年

見文雅

高汝礪

請褒贈珊延實古納及削胡沙虎官爵疏

貞祐元年

張行信

請先遣使與宋議和疏

興定元年

張行信

請廣選舉裁冗食疏

興定二年

張行信

言伐宋六不可疏

興定元年

見文雅

胥鼎

言九事疏

貞祐二年

見文雅

侯摯



金文最卷八

昭文張金吾月霄輯

奏疏

請削去明肅帝封號疏 大定二十二年

宣孝太子

海陵庶人首相閔宗無匡救之益迺伺其閒隙肆行大逆盜據神器十有二年罪惡貫盈天所勦絕其父明肅豈可使之猶竊帝尊之名仰惟祖宗之神靈在天而其子海陵親弑太祖之世嫡閔宗且屠滅太宗之孫靡有子遺若明肅之有知未必以其偽號為榮海陵既正大逆之罪義當緣坐況於封爵今猶有其帝號者不過以明肅勳親之故且其已死不與於海陵之亂故特忍而存之莫若重宗廟尊朝廷以正上下名分削去明肅帝號止從舊封庶乎宗廟朝廷之禮一舉而兩得 大金集禮

金吾案金史載皇太子表與此略異想經修史者修飾附錄於後

追維熙宗世嫡統緒海陵無道弑帝自立崇正昭穆削其煬王俾



齒庶人之列瘞之間墳不封不樹既已申大義而明至公矣海陵追崇其親逆配於廟今海陵既廢為庶人而明肅猶竊帝尊之名列廟祧之數海陵大逆正名定罪明肅亦當緣坐是時明肅已殂不與於亂臣以為當削去明肅帝號止從舊爵或從太祖諸王有功例加以官封明詔中外俾知大義

獄中上熙宗疏

天會十五年

宗翰

臣聞功大則謗興德高則毀來此至言也自振古之論以周公之聖人也當成王即政之初以言其業則未盛也以言其時則未太平也以言其君則幼君也周公是時建功立事制禮作樂盡忠竭力勤勞王家公之功德編於詩書流傳於天下自古及今於世無愧焉尚有四國之流言誅弟之過也況後世不及周公者乎臣今所慮輒敢辨於陛下念臣老矣臣於天會之初從二先帝破遼攻宋兵無五萬之眾糧無十日之儲長驅深入旌旗指處莫不請命降遼宋二主及骨肉盡歸囚虜遼宋郡邑歸我版圖方今東濱大

海西徹狼溪南連交廣北底室韋罔不臣妾然以大金剗基洪業繼治盛朝先帝所以委臣之力也又扶持陛下幼冲以臨大寶南面天下此成王之世也臣之忠勤過於周公之闕文賴成王之聖慮也今臣雖吐其言在陛下察其情臣再陳前日之罪御林牙兵忽然猖獗干冒陛下用臣出師之任臣受命欲竭駑鈍之力盡淺拙之謀以狂孽指日可安不期耶律潛伏沙黨復反交攻凡三晝夜其勝負未決分猶可為戰柰杜充糧草已斷人馬凍死御林牙兵知我深入重地前不樵蘇後又糧斷所以王師失利又副將外家得心生反逆背負朝廷外家得之反背有其由矣知父兄妻子並在御林牙軍中兩軍發覺其外家得將軍下數千騎自亂我軍使臣不得施行此大敗之罪也非臣怠慢願陛下察臣之肝膽念臣有立國之功陛下有繼統之業可貸臣螻蟻之命嗚呼功成名遂身退天之道也臣嘗有此志貪戀陛下之聖意眷慕陛下之宗廟躊躇猶豫以至於此使臣伊呂之功反當長樂之禍願陛下釋



臣縲絏之難願成五湖之游誓竭犬馬之報

北盟會編

諫割地與宋疏

天會二年

宗翰

先皇帝征遼之初圖宋協力夾攻故許以燕地宋人既盟之後請加幣以求山西諸鎮先皇帝辭其加幣盟書曰無容匿遁逃誘擾邊民今宋數路招納叛亡厚以恩賞累疏叛人姓名索之童貫嘗期以月日約以誓書一無所致盟未葺平今已如此萬世守約其可望乎且西鄙未甯割付山西諸郡則諸軍失屯據之所將有經略或難持久請姑置割

金史

劾伊爾必斯疏

定二年

完顏伯嘉

古之為將者受命之日忘其家臨陣之日忘其身服喪衣鑿凶門而出以示必死進不求名退不避罪惟民是保阿里不孫膺國重寄握兵數萬未陳而潰委棄虎符既不得援枹鼓以死敵又不能負斧鑕而請罪逃命竄伏猥居里巷挾匿婦人為此醜行聖恩寬大曲赦其死自當奔走闕廷皇恐待命安坐要君略無忌憚迹其

情罪實不容誅此而不懲朝綱廢矣乞尸諸市以戒為臣之不忠者

金史

乞令有司舉堪任縣令者疏

貞祐四年

完顏素蘭

臣近被命體問外路官廉幹者擬不差遣若懦弱不公者罷之具申朝廷別議擬注臣伏念彼懦弱不公之人雖令罷去不過止以待闕者代之其能否又未可知或反不及前官蓋徒有選人之虛名而無得人之實跡古語曰縣令非其人百姓受其殃今若後官更劣則為患滋甚豈朝廷恤民之意哉夫守令治之本也乞令隨朝七品外路六品以上官各舉堪充司縣長官者仍明著舉官姓名他日察其能否同定賞罰庶幾其可議者或以闕選法紊資品為言是不知方今之事與平昔不同豈可拘一定之法坐視斯民之病而不權宜更定乎

金史

請慎選東宮官屬疏

貞祐四年

完顏素蘭

臣聞太子者天下之本也欲治天下先正其本正本之要無他在



選人輔翼之耳夫生於齊者能齊言而不能楚語未習之故也人之性亦在乎習之而已昔成王在襁褓中即命周召以為師保戒其逸豫之心告以持守之道終之功光文武垂休無窮欽惟陛下順天人之心預建春宮皇太子仁孝聰明出於天資總制樞務固已綽然有餘儻更選賢如周召之儔者使之夾輔則成周之治不足侔矣

金史

諫修見山亭疏

天興二年

完顏仲德

自古人君遭難播越於外者必痛自刻苦過自貶損然後可以動天感人克復舊物昨臣朝退道逢民夫數百人荷畚插杖數入宮問云將修見山亭及葺治同知衙以為游息之所此必非陛下意殆近侍官論有司為之臣愚以為不可敵人犯河南幾年矣京師陷沒諸郡皆殘圯所保完者獨一蔡耳蔡之公廨固不及宮闕萬分之一方之野處露宿則為有餘況車駕將行之時已嘗勞民治之今茲不輟恐人情解弛不足以濟大事

汝南遺事

諫選室女疏

天興二年

完顏仲德

禮重內則詩本后妃所以承宗祧廣繼嗣也頃聞遣人求良家子以充後宮臣知陛下必不為色為社稷計耳然小民無知更相傳諷以為汴京陷沒之後七廟乏祀兩宮播遷陛下幸蔡州志圖刷恥然駐蹕以來不聞遠略而先求處女以示久居臣愚以為民愚而神不可不畏況征進有日艱於從行宜俟退敵更求配耦

汝南遺事

諫毀宋故都邱陵疏

鈕祜祿沒雅

臣聞治國之道莫如內安百姓外和鄰敵內外既安何憂於治伏自陛下龍飛以來國安民富四方綏靖雖湯禹之德無踰焉臣愚不知忌諱冒死謹言皇太孫春秋方壯識量宏遠神機英武非臣下所能發揚潛德正宜謹擇儒學愷厚之士輔佐聰明如近奏南宋臣未敢奉詔且南宋流播江外六十餘年無不宵旰嘗膽伺我之隙如南京開封府殘宋故都洛陽宋之邱陵二者乃宋人寢興



想望之所宜加修繕常塞宋人之望況自撫定以來彼邦遵服貢賦以時不惟財匱國貧蓋亦念故巢而恐廢邱陵爾若一旦恃富強遠失宋人過望之意使人藉辭激眾歲貢失時以勞聖慮進討加兵必矣費用國資軍民勞苦天下震驚兩國生靈墮於塗炭豈可忽諸陛下聖功神武日月之明爰念無名之師不宜復蹈前轍安危之係未可知今日之計莫若內安民生外修和好陰為坐困東南之策因其饑饉乘其盜賊謹修邊備養成伺釁以謀混一今後所差奉使乞降指揮預選令於南京考射閱習然射片時勝負臣下希賞烏足以係國家榮辱皇太孫建立之初宜修文德仰佐以福天下如其所請神明之志甚銳實非宗廟萬世之利

編

再諫北幸疏

明昌四年

董師中

近年水旱為殄明詔罪已求言罷不急之役省無名之費天下欣幸今方春東作而亟遣有司修建行宮揆之於事似為不急況西

北二京臨潢諸路比歲不登加以民有養馬簽軍挑壕之役財力大困流移未復米價甚貴若扈從至彼又必增價日糴升合者口以萬數舊籍北京等路商販給之倘以物貴或不時至則饑餓之徒將復有如曩歲殺太尉馬毀太府瓜果出忿怨言起而為亂者矣書曰民情大可見小人難保況南北兩屬部數十年捍邊者今為必里哥孛瓦誘脅傾族隨去邊境蕩搖如此可虞若忽之而往豈聖入萬舉萬全之道哉迺者太白晝見京師地震又北方有赤色遲明始散天之示象冀有以驚悟聖意修德銷變矧夫逸遊古人所戒遠自周秦近逮隋唐與遼皆以是生釁可不慎哉可不畏哉

金史

乞通上下之情疏

明昌元年

徒單鑑

臣竊觀唐虞之書其臣之進言於君曰戒哉懋哉曰吁曰都既陳其戒復導其美君之為治也必曰稽於眾舍己從人既能聽之又能行之又從而興起之君臣上下之間相與如此陛下繼興隆之



運撫太平之基誠宜稽古崇德留意於此無因物以好惡喜怒無以好惡喜怒輕忽小善不恤人言夫上下之情有通塞天地之運有否泰唐陸贄嘗陳隔塞之九弊上有其六下有其三陛下能慎其六為臣子者敢不慎其三哉上下之情既通則大綱舉而羣目張矣

金史

請肅禁籟增諡號正風俗立綱紀戒妒忌嚴宮衛疏 熙宗時

程 案

殿前點檢司古殿巖環衛之任所以肅禁籟尊天子備不虞也臣幸得近清光從天子觀時畋之禮比見陛下校獵凡羽衛從臣無貴賤皆得執弓矢馳逐而聖駕崎嶇沙漠之地加之林木叢鬱易以迷失是日自卯及申百官始出沙漠獨不知車駕何在瞻望久之始有騎來報皇帝從數騎已至行在竊惟古天子出入警蹕清道而行至於楚畋雲夢漢獵長楊皆大陳兵衛以備非常陛下膺祖宗付託之重奈何獨與數騎出入林麓沙漠之中前無斥候後

無羽衛甚非肅禁籟之意也臣願陛下熟計之後若復獵當預戒有司圖上獵地具其可否則後下令清道而行擇衝要稍平之地為駐蹕之所簡忠義爪牙之士統以親信腹心之臣警衛左右俟其麋鹿既來然後馳射仍先遣搜閱林藪明立標幟為出入之馳道不然後恐貽宗廟社稷之憂臣伏讀唐史追尊高祖以下諡號或加至十八字前宋大中祥符間亦加至十六字亡遼因之今陛下亦受崇天體道欽明文武聖德十字臣竊謂人臣以歸美報上為忠天子以追崇祖考為孝太祖武元皇帝受命開基八年之間奄有天下功德茂盛振古無前止諡武元二字理或未安何以示將來臣願詔有司定議諡號庶幾上慰祖宗在天之靈使耿光不烈傳於無窮古者天子皆有巡狩無非事者或省察風俗或審理冤獄或問民疾苦以布宣德澤皆巡狩之名也國家肇興誠恐郡國新民逐末棄本習舊染之污奢侈詐偽或有不明之獄僭濫之刑或力役無時四民失業今鑿輅省方將憲古行事臣願天心洞



照委之長貳釐正風俗或置匭匣以伸冤枉或遣使郡國問民無告皆古巡狩之事昔漢昭帝問疾苦光武求民瘼如此則和氣通天下不平可坐而待也臣聞善醫者不視他人之肥瘠察其脈之病否而已善計天下者不視天下之安危察其紀綱理否而已天下者人也安危者肥瘠也紀綱者脈也脈不病雖瘠不害脈病而肥者危矣是故四肢雖無故不足恃也脈而已矣天下雖無事不足矜也綱紀而已矣尚書省天子喉舌之官綱紀在焉臣願詔尚書省戒厲百官各揚其職以立綱紀如吏部天官以進賢退不肖爲任誠使升黜有科任得其人則綱紀理而民受其賜前代興替未始不由此者虞舜不告而娶二妃帝嚳娶四妃法天之四星周文王一后三夫人嬪御有數選求淑媛以充後宮帝王之制也然女無美惡入宮見妒陛下欲廣嗣續不可不知而告戒之臣伏見本朝富有四海禮樂制度莫不一所宮禁之制尙未嚴密胥吏健卒之輩皆得出入莫有呵止至淆混而無別雖有闌入之法久尙

未行甚非嚴禁衛明法令之意陛下不可不知而必行

金史

請通檢貧富疏

承安二年

高汝礪

年前十月嘗舉行推排之法尋以踰時而止誠知聖上愛民之深也竊聞周制以歲時定民之眾寡辨物之多少入其數於小司寇以施政教以行徵令三年則天下大比按爲定法伏自大定四年通檢前後迄今三十餘年其閒雖兩經推排其浮財物力惟憑一時小民之語以爲增減有司惟務速定不復推究其實由是豪強有力者符同而幸免貧弱寡援者抑屈而無訴況近年以來邊方屢有調發貧戶益多如止循例推排緣去歲條理已行人所通知恐新強之家預爲請囑狡獪之人冀望至時同辭推唱或虛作貧乏故以產業低價質典及將財物徙置他所權止營運如此姦弊百端欲望物力均一難矣欲革斯弊莫若據實通檢預令有司照勘大定四年條理嚴立罪賞截日立限關防禁約其閒有可以輕重者斟酌行之去煩碎而就簡易戒騷擾而事鎮靜使富者不得



以苟避困者有望於少息則賦稅易辦人免不均之患矣

金史

諫先與宋議和疏

興定元年

高汝礪

言者請姑與宋議和以息邊民竊以爲非計宋人多詐無實雖與文移往來而邊備未敢遽撤備既不撤則議和與否蓋無以異或復蔓以浮詞禮例之外別有求索言涉不遜將若之何或曰大定閒亦嘗先遣使今何不可竊謂時殊事異難以例言昔海陵師出無名曲在於我是以世宗卽位首遣高忠建等報諭宋主罷淮甸所侵以修舊好彼隨遣使來書辭慢易不復奉表稱臣願還故疆爲兄弟國雖其樞密院與我帥府時通書問而侵軼未嘗已也旣而征西元帥合喜敗宋將吳璘姚良輔於德原州右丞相僕散忠義右副元帥紇石烈志甯敗李世輔於宿州斬首五萬兵威大振世宗謂宰臣曰昔宋人言遣使請和乘吾無備遂攻宿州今爲我軍大敗殺戮過當故不敢復通問朕哀南北生靈久困於兵本欲息民何較細故其令帥府移書宋人以議和好宋果遣使告和以

當時堂堂之勢又無邊患竟免其奉表稱臣之禮今宋棄信背盟侵我邊鄙是曲在彼也彼若請和於理爲甚豈當先發此議而自示弱耶恐非徒無益反招謗侮而已

金史

請減免河南添徵通寶疏

興定元年

高汝礪

臣聞國以民爲基民以財爲本是以王者必先愛養基本國家調發河南爲重所徵稅租率常三倍於舊僅可供億如此其重也而今五月省部計歲收通寶不敷所支乃於民間科斂桑皮故紙錢七千萬貫以補之又太甚矣近以通寶稍滯又加兩倍河南人戶農民居三之二今稅租猶多未足而此令復出彼不糶所當輸租則必減其食以應之舍此將何納焉夫事有難易勢有緩急今急用而難得者芻糧也出於民力其來有限可緩圖而易爲者鈔法也行於國家其變無窮以國家之所自行者而強求之民將若之何向者大鈔滯更爲小鈔小鈔弊改爲寶券寶券不行易爲通寶從權制變皆由於上尙何以煩民爲哉彼悉力以奉軍儲已患不



足又計口計稅計物計生殖之業而又添徵通寶若是其剝苟不能給則有逃亡民逃亡則農事廢兵食何自而得有司不究遠圖而貪近效不固本原而較末節誠恐軍儲鈔法兩有所妨臣非於鈔法不為意也非與省部故相違也但以鈔法稍滯物價稍增之害輕民生不安軍儲不給之害重耳惟陛下外度事勢俯察陳言特命有司減免則羣心和悅而未足之租有所望矣

食貨志

金史本傳參

請褒贈珊延實古納及削胡沙虎官爵疏

貞祐元年

張行信

春秋之法國君立不以道若常與諸侯盟會即列為諸侯東海在位已六年矣為其臣者誰敢干之胡沙虎握兵入城躬行弑逆當是時惟鄴揚石古乃率眾赴援至於戰死論其忠烈在朝食祿者皆當愧之陛下始親萬機海內望化褒顯二人延及子孫庶幾少慰貞魂激天下之義氣宋徐羨之傅亮謝晦弑營陽王立文帝文

帝誅之以江陵奉迎之誠免其妻子胡沙虎國之大賊世所共惡雖已死而罪名未正合暴其過惡宣布中外除名削爵緣坐其家然後為快陛下若不忍援立之勞則依倣元嘉故事亦足以示懲戒

金史

請先遣使與宋議和疏

興定元年

張行信

今以遣使為不當臣竊惑之議者不過曰遣使則為先示弱其或不報報而不遜則愈失國體臣獨以為不然彼幸吾釁隙數肆侵掠邊臣以兵卻之復來我大國不責以辭而敵以兵茲非示弱乎至於問而不報報而不遜曲自在彼何損於我昔大定之初彼嘗犯順世宗雖建丞相烏者行省於汴實令元帥撒合輦先為辭詰之彼遂伏罪其後宋主奪取國書朝廷復欲加兵丞相婁室獨以為不可及刑部尚書梁肅銜命以往尋亦屈焉在章宗時猖狂最甚猶先理問而後用兵然則遣使詳問正國家故事何失體之有且國步多艱戍兵滋久不思所以休息之如民力何臣書生無甚



高論然事當機會不敢不罄其愚惟陛下察之

金史

請廣選舉裁冗食疏

興定二年

張行信

近聞保舉縣令特增其俸此朝廷為民之善意也然自關以西尙  
 未有到任者遠方之民不能無望豈舉者猶寡而有所不敷耶乞  
 詔內外職事官益廣選舉以補其闕使天下均受其賜且丞簿尉  
 亦皆親民而獨不增俸彼既不足以自給安能禁其侵牟乎或謂  
 國用方闕不宜虛費是大不然夫重利祿者固使之不擾民也民  
 安則國定豈為虛費誠能減裁冗食不養無用之人亦何患乎不  
 足今一軍充役舉家廩給軍既物故給其子弟感悅士心為國盡  
 力耳至於無男丁而其妻女猶給之此何謂耶自大駕南巡存贍  
 者已數年張頤待哺以困農民國家糧儲常患不足顧乃久養此  
 老幼數千萬口冗食虛費正在是耳如即罷之恐其失所宜限以  
 歲月使自為計至期而罷復將何辭

金史 以上原列卷十六

金文最卷八



